

東  
華  
續  
錄

東華續錄

乾隆四十一

臣王先謙敬編

臣周瀚蕃恭校

乾隆二十年春正月丁丑命定邊左副將軍阿睦爾撒納率參贊大臣額駙色布騰巴勒珠爾郡王品級青滾雜卜內大臣瑪木特奉天將軍阿蘭泰帶哨探兵由北路進剿定邊右副將軍薩喇爾率參贊大臣郡王班珠爾貝勒品級扎拉豐阿內大臣鄂容安帶哨探兵由西路進剿○辛巳諭皇十四叔恂郡王自復封王爵以來甚屬恭謹竭誠供職昨聞患病適御齋宮是以先遣阿哥等往視賞給經被今聞溘逝深爲惻然著派三阿哥前往穿孝賞銀一萬兩料理喪務俟逾祭祀之期朕當往奠尋予祭葬諡曰勤○癸未上臨故恂郡王允禔喪次賜奠○諭軍機大臣等據阿睦爾

撤納奏稱詢據投降之庫本告稱包沁人等投入哈喇額爾齊斯居住彼處人皆言大兵前來須待明年草青當此牲畜孳生暫且過冬一俟雪消卽往額林哈畢爾噶去等語看來準噶爾料我兵於出青前斷不能進若乘其不備於二月間進兵五六千必能成功著寄信阿睦爾撒納等卽遵旨辦理○甲申阿睦爾撒納奏察達克圖倫楚文稱兵至華額爾齊斯收獲包沁宰桑阿克珠爾與得沁人等並通瑪木特家口交恭格敦丹照管居住包沁之得木齊和濟木瑚里獲噶勒雜特之庫瑚詢稱從前巴朗在奇蘭居住聞大兵來逃往阿里克台察達克見往擒拏查包沁乃布魯特回種與烏英齊博東齊近日久知我兵少難保無虞隨派兵往迎恭格敦丹遷包沁於齋拉罕又侍衛蒙固勒等文稱扎哈沁之得木齊瑚爾海齊獲逃人納瑪林詢知被巴朗脅帶早欲歸降故來扎

哈沁居住有包沁人顏達什自伊犁來納瑪林向問據云在齊爾  
地方遇台吉巴特瑪車凌額琳沁及阿睦爾撒納宰桑默克勒齊  
三人領哈薩克兵據我牲口聞去擒達瓦齊見令顏達什庫綱解  
營詢問諭軍機大臣等阿睦爾撒納將新收包沁人等安插齊拉  
罕甚是將來招服噶勒雜特人等亦著照此辦理朕從前惟聞阿  
睦爾撒納征戰甚勇今閱伊所奏如令顏達什庫綱前來詢問準  
噶爾情形及發兵接濟察達克等甚合機宜朕深嘉之察達克等  
不費一矢卽收服包沁人眾顏達什復稱巴特瑪車凌帶領哈薩  
克兵往討達瓦齊看來準噶爾內亂計窮力竭我兵神速卽可成  
功今若度量情形可無庸會合西路之兵卽揀選精兵數千於二  
月中旬奮勇深入更覺易於集事著交阿睦爾撒納酌量辦理察  
達克此次收服包沁人眾及往擒巴朗等殊屬奮勉其人亦頗誠

實除烏梁海兵丁不必派往外伊身及伊所帶曾經效力之烏梁海二十人仍帶領前進可卽傳諭阿睦爾撒納知之尋實授察達克副都統授圖倫楚頭等侍衛翁郭爾扎木禪二等侍衛○諭通瑪木特爲人誠實恭敬朕甚嘉悅是以加恩授爲散秩大臣賞實衣服銀物今聞遠逝殊堪軫念著傳諭軍前大臣於軍營內支銀二百兩賞伊家屬治喪並揀選伊子襲職再伊家屬如在原游牧處著庫克新瑪木特照看或欲來察哈爾地方卽相依薩喇爾居住並令其加意照看○丁亥諭軍機大臣等阿睦爾撒納等奏察達克圖倫楚等據包沁之得木齊和濟木瑚里通瑪木特所屬得木齊哈喇勒岱告稱噶勒雜特之宰桑哈薩克錫喇都噶爾領兵二千欲擄包沁人眾隨卽帶兵退回此必包沁人內有陰懷異心者虛爲聲揚察達克等並未詳察卽已退兵適爲其所愚耳因此

益見阿睦爾撒納前將包沁人等安置齋拉罕地方甚合機宜厄魯特侍衛達什敦多布係哈薩克錫喇一處宰桑都噶爾之兄其戶口尙在噶勒雜特今伊情願前往招服噶勒雜特人等並擒拏巴朗朕已賞達什敦多布副都統職銜令其馳驛前往軍營此際察達克等雖回不過到齋拉罕等處著阿睦爾撒納速諭伊等卽於所到處等候達什敦多布不必遣包沁兵前往著於努三所管兵內再派數百名共備一千交察達克圖倫楚翁郭爾扎木禪及達什敦多布公同帶領前進噶勒雜特聞我兵退回必然無備乘此加兵自更易於成功阿睦爾撒納卽遵朕旨明白曉諭妥協辦理一面速行回奏○停止江南河工捐栽柳樹○己丑諭軍機大臣等阿睦爾撒納等奏烏梁海總管赤倫欲帶人前往招服汗哈屯之烏梁海人眾隨卽差伊前往阿睦爾撒納辦事果斷毫無猶

豫朕心深爲嘉悅著將朕所帶荷包一對賞阿睦爾撒納並於彼處賞給銀一千兩再傳諭阿睦爾撒納俟赤倫事竣回營一面馳奏一面卽傳朕旨賞給赤倫副都統職銜以示鼓勵○革貝勒車登扎布任以郡王品級貝勒青滾雜卜爲喀爾喀副將軍○庚寅諭軍機大臣等昨據阿睦爾撒納奏遣赤倫前往招服汗哈屯之烏梁海等想此時赤倫已到事已就緒厄魯特烏梁海人眾旣於舊遊牧處居住將來汗哈屯之烏梁海等投至或可照此辦理若必須遷移則與察達克等烏梁海遊牧一同遷進俾新舊所收之人彼此連界居住亦可其宰桑等至軍營叩見將軍大臣時朕卽加恩賞給品級遣回管理屬眾和托輝特郡王品級貝勒青滾雜卜熟悉烏梁海人情性朕已派令照管著傳諭阿睦爾撒納會同青滾雜卜妥商辦理○辛卯諭軍機大臣等據唐喀祿奏班珠爾

等懇請仍留北路先據薩喇爾奏班珠爾人甚去得而和碩特兵  
又最勇健若與杜爾伯特兵於西路同進實爲有力是以降旨令  
其調往西路今班珠爾等既願留北路兼於進取事宜有益卽著  
照伊所請仍與阿睦爾撒納前進準噶爾平定之後朕意將四衛  
拉特封爲四汗俾各管其屬封車凌爲杜爾伯特汗阿睦爾撒納  
爲輝特汗班珠爾爲和碩特汗朕曾面諭車凌阿睦爾撒納二人  
第班珠爾尙未知悉可卽諭伊知之再納噶察告稱將和碩特人  
移駐青海之處從前納噶察來熱河時朕降旨俟事成後或在原  
遊牧或移居青海悉惟爾便並未諭令必移青海居住也此阿睦  
爾撒納訥默庫所共聞况朕方將封班珠爾爲和碩特汗乃轉令  
伊舍舊地而移青海乎若納噶察不過一扎薩克或欲移駐青海  
亦無不可俟事定後伊再具奏請旨班珠爾未來熱河而納噶察



又誤傳朕旨著唐喀祿明白曉諭班珠爾等知之又諭唐喀祿奏班珠爾等願留北路一摺著鈔寄班第薩喇爾知悉班珠爾兵少本不成隊伊旣不願往西路朕已允其所請但朕觀納噶察爲人狡詐喜事今所告唐喀祿之言有事成後封阿睦爾撒納爲汗帶領哈薩克阿布賚等瞻仰令與阿睦爾撒納連界居住從此當愈加和好等語甚屬含糊似事成時止封阿睦爾撒納爲汗殊不知準噶爾平後亦不過將伊四衛拉特台吉分封爲汗令各管屬下而已並非止封阿睦爾撒納一人統管準噶爾地方也若果如此是仍爲達瓦齊矣試思朕之辦理此事果專爲伊等乎伊等豫爲此言試探是其所望甚奢若將來止封阿睦爾撒納爲輝特汗轉不免於失望班第薩喇爾可將封阿睦爾撒納爲輝特汗其餘三姓台吉內封爲三汗之處於閒中言及俾伊等熟聞庶幾妄念可

消至阿睦爾撒納遊牧在塔爾巴哈台果否與哈薩克毗連若相距遙遠而爲此說是欲藉哈薩克以爲擅權之地也伊等果知奮勉朕不惜格外加恩至專擅則斷乎不可著侍衛扎克蘇密齋此旨傳諭班第薩喇爾留心察看俟準噶爾旣平阿睦爾撒納帶彼處頭目來時再將哈薩克之事會議請旨辦理○壬辰諭軍機大臣等永常係滿洲大臣平日尙知奮勉是以命爲將軍俾與薩喇爾盡心商酌集事今閱方觀承奏伊催趲自京起程之大隊兵丁則誤會朕從前催令哨探兵前進之旨何糊塗悖謬一至此耶再劉統勳參奏趙本植承餵馬匹偷漏草料一案有永常經過甯夏該府求派餵馬之語雖永常未必因其懇求卽令承餵但以軍需重事不計其人可否輒照所求委派可見漫不經心著傳諭永常嗣後務遵朕旨諸事與薩喇爾商辦慎勿以已爲將軍任意妄行

再薩喇爾進兵永常不必同進務待眾兵齊集帶領前往毋得故違取罪○癸巳阿睦爾撒納奏阿克珠勒告稱巴特瑪車凌與哈薩克往征達瓦齊博囉塔拉以外已被搶掠諭軍機大臣等阿睦爾撒納將阿克珠勒等所告巴特瑪車凌與哈薩克人眾往征達瓦齊之處奏聞可見達瓦齊勢已窮蹙準噶爾業成瓦解之形若不迅速進兵必致哈薩克倖獲其利著阿睦爾撒納度量馬力或五六十或三四千務期奮勇前進迅奏膚功先因察達克等爲包沁人言所誑卽行撤兵朕已降有明旨今觀阿克珠勒之言則其欺誑愈見俟達什敦多布到彼仍遵前旨與察達克圖倫楚帶兵前往在阿睦爾撒納所領大隊之前另作一隊哨探兵方有裨益再朕曾降旨令西路哨探兵聽候北路起程日期亦於原定日期之前先行進發今已另諭薩喇爾若西路先至博囉塔拉有機可

乘則不必更候北路儻北路先至亦然如必須兩路合攻則仍守候一齊進發總之兩路將軍大臣皆爲朕出力之人不論孰先孰後惟期剋日成功可傳諭阿睦爾撒納等知之○乙未諭軍機大臣等去年收服扎哈沁時努三烏勒登卽應往擒巴朗乃與薩喇爾等商議便爾回營伊等之意不過謂既有薩喇爾之言卽與己無涉努三烏勒登皆係御前行走舊僕今又領兵卽薩喇爾不去亦應向前豈得反藉薩喇爾爲推託况察達克圖倫楚等閒隔三兩月前往尙將包沁人等收獲伊等彼時若卽領兵前進巴朗猶未遠屢亦可一併擒獲且新厄魯特擄掠不能禁止並聞其選取佳物牲畜成羣不料無恥至於此極努三烏勒登著卽解任拏往軍營交阿睦爾撒納審明具奏努三駐處著策楞前往烏勒登駐處著舒赫德前往將所得擄掠物件徹底查出再哈達哈辦理馬

匹事務完竣卽令帶兵在烏勒登處駐紮其努三駐處令塔勒瑪  
善前往○諭前色布騰巴勒珠爾奏稱阿睦爾撒納曾言瑪木特  
係軍威收服與傾心降附者不同乞將伊等在哨探兵內領兵之  
處停止朕因降旨在前忽爾中止啓其疑心隨卽批示曉諭今據  
阿睦爾撒納奏稱二月十五日內兵卽前進瑪木特於正月十七  
日始自京起程斷難馳赴朕思阿睦爾撒納自到軍營諸事盡心  
辦理井井此次進兵惟伊是賴瑪木特之去否原屬無關緊要若  
旣到軍前自不便不令其前往今已遲延不能同進伊自不妄生  
疑慮原派扎哈沁兵三百名仍著阿睦爾撒納帶往再額爾齊斯  
屯田兵前命努三帶往今努三已解任著以塔勒瑪善代之親王  
成衮扎布向請效力軍前朕原派往額爾齊斯屯田著仍派伊前  
往辦理原定屯田兵丁僅派車凌等數十人及喀爾喀綠旗兵數

百名尙未敷用著阿睦爾撒納酌留厄魯特兵一二百名於屯田處展放卡倫防守又前哨大隊兵俱進烏里雅蘇台不可無人鎮守著留莫爾渾駐紮辦事此際辦理糧餉馬匹亦屬需人著舒赫德以章京銜協辦事務奏事一體列名著傳諭班第阿睦爾撒納等知之○丙申諭軍營撥運淮帶茶布○停本年經筵○范廷楷緣事解任以蘇崇阿爲江西按察使由河南河北道遷○戊戌諭軍機大臣等阿睦爾撒納以托忒字奏請還伊遊牧於烏里雅蘇台等處地方並將管理伊等遊牧大臣更換一員又稱伊屬下人內有從前離散者懇賞給印文前往招降等語從前朕已降旨俟平定準噶爾後分封四衛拉特其輝特人等卽在其內毋庸另給印文在阿睦爾撒納之意以班第不允所行爲此陳奏著傳諭班第俟準噶爾既定將輝特所有阿睦爾撒納原管之人卽照所請令與伊

等會合居住如有屬人眾多之頭目亦一體賞給封號管束其屬  
卽車凌等之杜爾伯特班珠爾之和碩特均照此辦理至唐喀祿  
乃新用之人不諳事務朕已降旨撤回阿睦爾撒納等遊牧移至  
烏里雅蘇台等處甚屬妥協卽照所請行班珠爾係與阿睦爾撒  
納同來之人亦應一併遷移其如何遷移之處著班第阿睦爾撒  
納會同納穆扎爾一面辦理一面奏聞阿睦爾撒納惟圖迅速成  
功早受朕恩勿以遊牧爲念新派之納穆扎爾曾照管杜爾伯特  
遊牧因彼處無事特將伊調管輝特和碩特部落至於該部落生  
計果有不足納穆扎爾卽行奏聞朕自加恩撫恤如車凌車凌烏  
巴什等來降後偶遇災疫稍爲艱窘朕卽加恩撫綏伊等俱感戴  
朕恩樽節勤儉漁獵爲生盡可樂業阿睦爾撒納可令宰桑等諄  
切曉諭其屬務令盡力耕種使永遠生計有資以副懷柔遠人至

意諭定邊右副將軍薩喇爾曰阿睦爾撒納以托忒字奏請將伊  
逆牧移居烏里雅蘇台等處朕以事屬可行已准其請惟奏請印  
立招降伊輝特台吉屬人一事是其欲取多人占據地方之意已  
經微露似平定準噶爾全爲伊一人集事矣薩喇爾到彼務須留  
心防範慎勿任其所行然亦不可稍爲漏洩此時薩喇爾進兵愈  
速愈妥若使阿睦爾撒納先進似覺稍爲未便薩喇爾其善體朕  
意○辛丑阿睦爾撒納等奏詢據包沁之顏達什等稱去秋往伊  
犁見達瓦齊終日飲酒事務皆廢遣人往擒額琳沁旋即敗回哈  
薩克兵來行文各處備兵兵皆未到自齋爾至伊犁俱被搶奪其  
屬皆言自伊爲台吉無一日安甯人人嗟怨伊犁馬匹亦甚平常  
報聞○癸卯諭乞休終養國家恤老教孝之典亦人臣養廉資事  
之道其以實情陳請者無不俞允但漢人習氣往往進則託名於



受恩深重不敢言去而退則以本欲陳情奈非聖意不得自遂爲  
辭昨因幾暇偶閱舊案以增知識卽見查嗣庭記事內有難於乞  
身之語形之紀載可見向來卽有此習亦非一朝一夕之故查嗣  
庭之貪位謬記不待朕言而以今日諸臣之隱懷朕有不得不明  
言之者卽如大學士史貽直陳世倌皆年踰七十然精力尙健儘  
可供職且伊等並無過愆朕自不忍遣之使去若謂從前朕治張  
廷玉之罪以爲炯鑒則大不然張廷玉在彼時朕見其動履龍鍾  
特令軍機大臣等到伊寓傳旨令其乞休此眾人所共知共見者  
乃伊奏稱史貽直曾言伊不應配享 太廟向朕要求左券朕卽  
賜詩允准而伊次日竟不親詣官門謝恩實出情理之外夫史貽  
直係獨對原有此言而朕不以爲然亦並未告之張廷玉張廷玉  
何由而知則揣摩朋黨之風謂之盡無可乎此乃張廷玉罪由自

取初不因其引見歸老也且當朕令伊乞休時豈嘗授意使之要請又安能逆料其不親赴謝恩而因以治其罪耶設朕有此心則何以對張廷玉又何以對在廷諸臣耶且大臣中如任蘭枝魏定國梅穀成等指不勝屈皆以引年而去朕亦何嘗固留在京必不使享林泉之樂耶然此一身之事卽朕欲示君臣大義宜鞠躬盡瘁不宜棲遲偃仰此名朕亦受之至親老侍養天性至情朕以孝治天下何忍不曲加體恤而亦以爲朕不許朕實不受也卽如梁詩正之父年八十餘梁詩正在戶部尙書數年並未奏及至調任兵部乃有去志此際未必不有後言迨以冢卿協理閣務伊復戀職如前是豈伊父獨老於伊任兵部時耶及朕南巡親見伊父衰憊失明而伊僅乞暫假旋即赴闕朕始諭意令其請告以全名節此亦可見朕之用心矣又如近日按察使沈廷芳來京陛見詢知

伊母已過八旬朕方爲之惻然而伊乃逡巡以迎養爲請彼意如此朕將何以爲辭試思望九老婦何忍令其舟車跋涉去就水土不服之鄉以博迎養之名且藉口於甫經升任不敢遽告是誠何心道員中足勝巢司者自不乏人豈少一沈廷芳而不令其終養耶况沈廷芳前爲御史章奏中侈談忠孝古語云求忠臣於孝子之門何獨忠於君而忘於親耶卽楊錫紱向以道學自負乃父喪甫聞聞巡撫之命亦何嘗以母老請養又侍郎內如嵇璜彭啓豐巡撫內如蔣炳衡哲治皆有老親在堂因循戀職初無一言可見伊等平日寵利縈心旣不能以至情懇告而強顏支飾轉以進止不能自主諉之於朕朕豈肯受耶當梁詩正回籍時卽有人疑汪由敦擠之使去是以協辦之缺朕卽用孫嘉淦繼以蔣溥若論其才學自不出汪由敦之上第在諸尙書中蔣溥尙可勝此且係世

臣因降旨擢用使汪由敦果能於朕前排擠梁詩正何以不能卽以其術委曲救護張廷玉耶此亦事之易見者至嵇璜奏曰修兩部對調本以裘曰修與署尙書楊錫紱及選司鄧錫禮均籍江西伊等素講鄉情不得不爲改調儻沾沾以養廉厚薄爲重輕身列九卿者豈應出此若嵇璜謂因初調吏部不敢陳情則未調之先何事忘之朕今亦非催令若而人者養親而去但去不去由彼而此旨旣降則貪位後言之人尙能施其技乎特頒此旨曉諭中外知之○甲辰諭直省建立名宦鄉賢祠卽古者警宗之祀所以崇德尙賢與斯祀者必其人實可當之無愧方足以光俎豆而式鄉閭其典綦重昨於幾暇恭讀 皇考世宗憲皇帝上諭有江西撫臣謝旻以原任學道高鎮崇祀名宦降 旨訓飭並詢問江西通省紳士應否崇祀令其據實陳奏 皇考於崇祀一事加意慎重

如此所以爲世道人心計者具有苦心朕不勝欽感卽位以來各省督撫題請崇祀之人漸多該部或駁或准不過如所議行今見此旨因憶近時大臣中曾有以祖父得祀鄉賢具摺謝恩者召見九卿論及此事則卽尙書王安國左都御史楊錫紱之父其同時題請部駁者曰徐景京則其子固非身列顯要者也設亦九卿祖父則該部亦必議准矣可見該撫之所請原在可駁可准之列而部臣之所議卽寓高手下手之心夫大臣身居九列部臣督撫誼屬同官彼此瞻徇勢所不免卽使採訪悉爲公當而悠悠之口難保其必無遺議又況名實未必盡孚者乎且入祠旣多朝賢先人則潛德韜光之正士必且恥與爲伍崇祀大典將不以爲榮而以爲辱至實在政績懋著德望俱隆者或子孫不能自振必轉致湮沒無傳矣當其具呈公舉雖託之輿論而主持爲首仍係姻族

矜士貢諛徵賄何所不有風勵激勸之謂何不亦瀆典章而襲名  
器乎朕亦非謂大臣祖父必不可入祀也果使政事人品足爲矜  
式自必久而益彰何妨待之十數年後而必及其子之備位大僚  
亟亟題請以至公之舉而冒至私之名乎其入祠年歲已久者姑  
免追究所有王安國楊錫紱之父禮部行文各該省卽爲撤出從  
前具題之督撫及覆准之該部堂官俱著交部查明嚴加議處嗣  
後子孫見任九卿者其祖父槩不得題請入祠其身後鄉評允當  
者聽著爲令總之徇情曲庇卽黨援門戶之漸昔 皇考洞悉此  
等陋習大加振刷如查洞庭呂留良諸案實足以挽頽風而勵名  
教萬世子孫臣庶何忍不兢兢遵守使綱紀肅清俗尙敦厚乃國  
家之福卽四海臣民之福也儻以日久漸弛復萌故智將來如有  
似查洞庭呂留良不法之案朕亦非不能執國憲以儆奸頑者諸

臣其共惕之

二月乙巳朔日有食之○諭軍機大臣等兆惠奏請同哨探兵前進與富德辦理臺站事務哨探兵進發隨營安臺既有將軍指麾又有富德查辦可以無庸兆惠前往烏里雅蘇台甚屬緊要莫爾渾一人尙恐不能周詳著兆惠卽留烏里雅蘇台協辦事務在領隊大臣上行走○丙午諭朕近於幾暇恭讀 皇考世宗憲皇帝諭旨於禁止貢獻營諄切訓誡至再至三而逆犯查嗣庭日記有進硯頭瓶湖筆一事形諸記載可見人心險薄何所不至益以仰見 皇考聖明洞照防微杜漸之淵衷所以維持世道者至深且遠因憶御極以來雖曾禁臣工貢獻而朕四十壽辰臣工於方貢外亦有進玩器書畫慶祝者在督撫諸臣受朕委任若因辦覓貢物而使屬員得以乘機迎合或貽累於富戶商人稍有人心者當

不出此設令有之亦斷不能逃朕洞鑒然僉邪好事之徒未免因  
此妄生疑議構造浮言是亦查嗣庭者流耳當此光天化日之下  
雖伊等技無所施而究不若槩行禁絕者之爲善也嗣後廷臣督  
撫其毋有所獻並諭中外知之○諭朕昨因論臣工終養一事降  
旨宣諭今日嵇璜彭啓豐各具摺陳情終養此奏若在降旨之前  
出自伊等至情迫切固當曲體允從茲特以面聆訓諭感發天良  
則所請乃導之自朕而伊等本未嘗有迫不及待之情此亦如禮  
部鄉賢在可准不可准之間其去留朕得而權衡之又當各視其  
人矣彭啓豐才本中平辦理部務亦屬竭蹶且伊係內廷翰林以  
文學爲職而上年扈蹕和詩視前邈邈所學日漸荒落著照所請  
准其回籍終養嵇璜在諸侍郎中才具尙可辦事且一時出兩侍  
郎缺亦未得其人仍著照舊供職伊面奏以去歲奉差南河會告



假歸省見伊母暮年衰病此奏出於中情實不因朕旨則伊自差  
竣回京已及半載何前此默無一言而今日於訓諭之後遂若是  
亟亟耶適合昨所降旨所謂情見乎辭無可置辨矣朕辦理諸務  
一秉大公毫無成見而確有定衡恐不知者以同請而去留各異  
妄生疑議將此再行宣諭中外知之○諭軍機大臣等據阿睦爾  
撒納奏前隊兵六千名於二月十五日以前進勦屯田兵丁亦相  
繼前往末後再派兵三千接續策應辦理甚是阿睦爾撒納等隊  
後添派之三千兵卽著班第帶往見在準噶爾情形窮蹙已極成  
功甚易朕意兩路哨探兵至博羅塔拉等處則與伊犁甚近彼處  
形勢卽可瞭然著阿睦爾撒納薩喇爾詳察彼處情形若無需續  
進大隊之兵可一面檄令撤回一面速行奏聞卽駐紮伊犁之大  
臣等須留兵跟隨亦卽於見在所領兵內挑留應用著傳諭兩路

將軍等知之○戊申諭軍機大臣等據劉統勳等奏官兵口糧酌議自行裹帶四十日官爲駄運八十日其在途行走軍營駐紮所需口糧另自哈密運往覈給等語官兵給與駝隻卽爲伊等裹帶口糧之用若仍官運何名裹帶又何用給與駝隻耶劉統勳所奏仍係軍行糧隨從前岳鍾琪等所辦舊例全不合此次機宜已於前奏降旨訓諭該協督尙未奉到是以仍有此奏耳見在北路辦理俱係兵丁自行裹帶西路自應畫一但恐北路伊等業已傳知先到之兵應令詳悉曉諭伊等錯辦之故一遵北路成例辦理至官兵一抵巴里坤卽行進發設或稍有停待無過數日並非久駐劉統勳等摺內所稱軍營駐紮口糧亦毋庸另行籌辦可併傳諭知之○己酉御史錢士雲奏巡幸之期王大臣驗看月選官不必更調得旨所奏是然猶有未盡更調何不可然一月之中少不過

一二多不過三五此數缺卽遲待數月亦不致費事嗣後更調仍許但留至朕回鑾引見如是則與該御史所奏並行不悖矣但調簡缺者多遠省之人錢士雲雲南人也故有此論若果有其事何不指參然其言自屬可行故並諭及又奏請變通外省坐補原缺之例論外省病痊起復坐補原缺之員皆經該部帶領引見其人稍優者朕無不降旨交各省督撫題補或交部卽用至降旨令其照例坐補者俱屬才具中平第年未衰邁又非有過愆是以不忍卽加擯棄令補原缺或可冀其駕輕就熟黽勉供職耳此係數年以來辦理之大槩並未嘗令出眾之才聽其坐老需次也今御史錢士雲欲於引見後變通成例發省委用此該御史未知朕因材甄錄之本意所奏不必行但此等照例坐補之人大率邊省居多若錢士雲因有同鄉故舊見在坐補而爲此奏是有心市德桑

梓假建言爲徇庇之地其風斷不可開錢士雲卽應交部議處矣  
若錢士雲另摺所奏調缺一事朕見有可行處不以人廢言卽已  
批准其見今坐補原缺之人該部查明具奏再行降旨○庚戌諭  
原任四川提督岳鍾琪於 皇考時宣力西陲勤勞頗著卽如逆  
犯曾靜遣張熙投遞逆書一事岳鍾琪與之設誓誘令供出實在  
姓名卽行參奏居心甚爲誠實其在西路軍營時驕縱狂妄於辦  
理軍務亦多錯謬然覈其功罪自不相掩至金川之役用爲提督  
雖彼時番酋有效順之意而岳鍾琪深入番巢住宿碉寨曉以順  
逆示以不疑亦其忠信素著所致是以加恩特於本身授爲威信  
公爵今伊已身故雖公爵不應世襲而其子孫竟無一世職朕甚  
憫焉岳鍾琪著賞給一等輕車都尉令其子孫世襲罔替以示朕  
追念舊勳之至意該部卽行文該督黃廷桂俟伊子孫服闋時給

咨送部引見○癸丑轉于敏中爲兵部左侍郎以李清芳爲兵部

右侍郎

由內閣學士遷

○以楊廷璋爲湖南布政使

由廣西按察使遷

○甲寅停

東三省滿洲烏拉齊等考試漢文○乙卯

上啓鑒謁

東陵○

分編新降烏梁海人戶爲七佐領○調梁翥鴻爲廣西按察使以

清馥爲湖北按察使

由江南糧道遷

○丙辰諭軍機大臣等達瓦齊雖有

罪之人究屬一部台吉大兵進征儻伊屬下見事勢窮蹙將伊獻

出或被巴特瑪車凌擒送阿睦爾撒納處毋加戕害一面解釋安

慰密派強幹人員留心看守一面奏聞候朕諭旨遵行至若衮布

乃向助達瓦齊肆行暴虐恣奸長惡之人儻見大兵進剿料難遁

逃俘獻達瓦齊希冀僥倖則斷不可恕班第等一到軍營卽縛衮

布於達瓦齊前數其罪惡派人押解來京○丁巳諭漢時西陲塞

地極廣烏嚕木齊及回子諸部落皆曾屯戍有爲內屬者唐初都

護開府擴地及西北邊今遺址久湮著傳諭鄂容安此次進兵凡  
準噶爾所屬之地回子部落內伊所知有與漢唐史傳相合可援  
據者並漢唐所未至處一一詢之士人細爲記載遇便奏聞以資  
採輯○戊午 上謁 昭西陵 孝陵 孝東陵 景陵至 孝  
賢皇后陵奠酒回鑾○己未召范時綬來京調胡寶琮爲江西巡  
撫以楊錫紱署湖南巡撫蔣溥署吏部尚書由戶部兼署○庚申諭軍  
機大臣等據班第等奏稱來降之噶勒雜特部人齊倫告稱噶勒  
雜特之宰桑哈薩克錫喇都噶爾等俱向伊犁遷去阿睦爾撒納  
之兄巴特瑪車凌等皆已敗出阿睦爾撒納謂其言荒唐無據噶  
勒雜特人等聞我兵收服包沁雖遷移他去我兵撤回伊等自仍  
歸原游牧居住且此際牲畜疲瘦又安能遂至伊犁所見甚是但  
既有此言則達什敦多布等爲前哨兵必須有兵接應方合機宜

著傳諭西路將軍副將軍等仍照阿睦爾撒納等所奏兩路大兵至博羅塔拉會合前進勿拘泥從前所降之旨再都噶爾原有投順之意今達什敦多布等又前往擒拏巴朗想都噶爾必聞我兵進發前來投誠巴特瑪車凌卽眞敗出諒亦不遠聞阿睦爾撒納領兵前進亦必來尋伊弟阿睦爾撒納惟相度事機小心辦理爲妥再巴朗背恩逃竄反捏浮言阻撓歸順之人甚屬可惡伊見在居近北路或聞大兵將至逃往西路亦未可定薩喇爾務遵前旨訪得巴朗信息卽另派兵先行前往擒拏巴朗解送京師正法勿令違颺○癸亥命貴州貴陽一府二廳七州縣平越石阡二府六州縣改隸糧道轄○乙丑以王際華爲內閣學士由詹事遷○丙寅上還京師○丁卯諭雲南易門等二州縣上年地震塌壓民戶加倍賑給○壬申諭軍機大臣等據薩喇爾等詢問蘇珠克圖告稱

哈薩克巴朗並非噶爾丹策零之弟朕前曾降旨詢問阿睦爾撒  
納據奏在哈薩克時留心察訪知係冒稱巴朗名色不足爲據合  
之薩喇爾所奏其爲假冒無疑再降人齊倫會言哈薩克兵見爲  
達瓦齊擊敗使哈薩克力量稍強能擒達瓦齊則進兵時須豫籌  
所以備禦之道今並未占據伊犁早已敗退我兵進剿尤爲便捷  
況兩路哨探兵會合一處已逾萬數乘機前進儘可迅奏膚功薩  
喇爾務加意奮勉仰副朕懷至擒獲達瓦齊後應如何辦理哈薩  
克事務會同班第阿睦爾撒納等詳籌妥辦

三月乙亥 上親耕藉田○己卯 上啓鑾謁 泰陵○召鄂昌

來京調陳宏謀爲甘肅巡撫以台柱署陝西巡撫

前廣西布政使戶部郎中○

命阿思哈以布政使銜協辦糧運

見任吏部郎中

○壬午 上謁 泰陵

回鑾○葉存仁以失察庫書包攬侵欺降補河南按察使以同德



爲浙江布政使富勒渾爲浙江按察使

由直隸熱河道遷

○癸未廣西巡

撫衛哲治奏原任湖南鹽驛道謝濟世縱子謝夢雄指官撞騙並攜帶二子赴湖廣江南就姻不聽查審得旨謝濟世前任御史以建言自命歷任監司屢蹈罪戾俱邀恩寬宥休致家居應自知檢束今據衛哲治題參縱子指官撞騙巧詞牽告不聽查審任意避匿此風斷不可長著湖廣江南督撫於謝濟世所到之處卽行拏解廣西俟該撫審明後仍解交刑部請旨○甲申諭軍機大臣等胡中藻所著堅磨生詩鈔悖逆譏訕之語甚多張泰開提督學政時爲之作序編次刊刻張泰開由編修擢至侍郎在內廷行走見此悖逆之作不知痛心疾首轉爲之刊刻傳播實乃喪心之尤今阿里衮審訊據供序文非伊所作集中前後編次序文甚多若非出於張泰開之手則爲此序者何人乎張泰開此時若不據實供

明卽日胡中藻到案質訊無可推諉始行供吐則張泰開之罪愈重著在京總理王大臣會同阿里衮嚴加訊究務得實情至孫夢達路談等雖經見過其詩尙係微員不足深究但追出詩集足矣若張泰開則曾任卿貳如此重師門而罔顧大義不重治其罪無以正人心而申憲典所有詩集四本著一併發交王大臣等逐條研訊奏聞朕回京時候胡中藻擎到自另有諭旨明發○諭永常奏稱帶領見在綠旗及回子兵於三月初九日繼前隊哨探兵進發永常辦事一味草率其急欲進兵意以事成時伊亦在彼處同有勞績耳此等意見愚而且鄙昨已降旨令伊不得僅帶綠旗官兵前進如已起程接旨後卽在中途等候俟各處兵丁齊集再行進發永常係總辦軍務大臣一切應辦應催之事皆係其職分朕令劉統勦前往不過協辦伊任內事耳伊理應將一切事務籌畫

周詳乃諸事推諉於劉統勳今急欲帶兵前進意以業已進兵則愈於伊無涉不思劉統勳一人不但不能辦理今又將鄂昌之事交與劉統勳豈能兼顧永常接到此旨即將帶往綠旗官兵交與領琳沁多爾濟帶領伊即回至肅州將陸續所到之兵辦給一切糧餉馬駝全行妥協起程有日伊然後尾行前進少有違誤斷不寬宥再車凌等此次行走奮勉朕是以加恩令於中途賞給羊隻或用肉乾此亦鼓勵戎行之意若使伊等口糧充裕而羊尚未到即爲少緩再給亦無不可而永常輒議令將羊隻折銀賞給試思以二千人而賞給一千餘兩之銀作何分給且見已進兵銀兩亦何所用之永常之辦理種種未協即此可見見在解往之折價銀兩既行分給不必置議仍遵原旨辦理羊隻及肉乾等項作速解往即行分給永常務遵旨辦理○乙酉 上駐蹕吳家莊閱永定

河隄○丙戌

上幸瞭鷹臺行圍射熊一槍殪虎二○

上召大

學士九卿翰林詹事科道等諭曰我朝撫育方夏於今百有餘年

列祖

列宗深仁厚澤漸洽區宇薄海內外共享昇平凡爲臣

子自乃祖乃父以來食毛踐土宜其胥識尊親大義乃尙有出身  
科目名列清華而鬼蜮爲心於語言吟詠之間肆其悖逆詆訕怨  
望如胡中藻者實非人類中所應有所刻詩題曰堅磨生詩鈔  
堅磨出自魯論孔子所稱磨涅乃指佛肸而言胡中藻以此自號  
是誠何心從前查嗣庭汪景祺呂留良等詩文日記謗訕譎張大  
逆不道蒙我 皇考申明大義嚴加懲創以正倫紀而維世道數  
十年來意謂中外臣民咸知儆惕而不意尙有此等鴟張猖吠之  
胡中藻卽檢閱查嗣庭等舊案其悖逆之詞亦未有累牘連篇至  
於如此之甚者如其集內所云一世無日月又曰又降一世夏秋

冬三代而下享國之久莫如漢唐宋明皆一再傳而多故本朝定鼎以來承平熙皞蓋遠過之乃曰又降一世是尙有人心者乎又曰一把心腸論濁清加濁字於國號之上是何肺腑至謁羅池廟詩則曰天匪開清泰又曰斯文欲被蠻滿洲俗稱漢人曰蠻子漢人亦俗稱滿洲曰達子此不過如鄉籍而言卽孟子所謂東夷西夷是也如以稱蠻爲斯文之辱則漢人之稱滿洲曰達子者亦將有罪乎再觀其與一世爭在醜夷之句益可見矣又曰相見請看都益背誰知生色屬裘人此非謂旃裘之人而何又曰南斗送我南北斗送我北南北斗中間不能一黍闊又曰再汎瀟湘朝北海細看來慙是如何又曰雖然北風好難用可如何又曰撒雲揭北斗怒竅生南風又曰暫歇南風競兩兩以南北分提重言反復意何所指其潛溪照景石詩中用周時穆天子車馬走不停及武皇

爲失傾城色兩典故此與照景石有何關涉特欲藉題以寓其譏  
刺訕謗耳至若老佛如今無病病朝門聞說不開開之句尤爲奇  
誕朕每日聽政召見臣工何乃有朝門不開之語又曰人間豈是  
無中氣此是何等語乎其和初雪元韻則曰白雪高難和單辭贊  
莫加單辭出尙書呂刑於詠雪何涉進呈南巡詩則曰三才生後  
生今日天地人爲三才生於三才之後是爲何物其指斥之意可  
勝誅乎又曰天所照臨皆日月地無道里計西東諸公五嶽諸侯  
瀆一百年來頻首同蓋謂獄瀆蒙羞頻首無奈而已謗訕顯然又  
曰亦天之子亦萊衣兩亦字悖慢已極又曰不爲遊觀縱盜驪八  
駿人所常用必用盜驪義何所取又曰一川水已快南巡下接云  
周王潁彼因時邁蓋暗用昭王南征故事謂朕不之覺耳又曰如  
今亦是塗山會玉帛相方十倍多亦是二字與前兩亦字同意其

頌蠲免則曰那似偏災今降雨況如平日佛然鑑朕一聞災歎立  
加賑恤何乃謂如佛鑑之難覲耶至如 孝賢皇后之喪乃有並  
花已覺單無蒂之句 孝賢皇后係朕藩邸時 皇考世宗憲皇  
帝禮聘賢淑作配朕躬正位中宮母儀天下者一十三年然朕亦  
何嘗令有干與朝政驕縱外家之事此誠可對天下後世者至大  
事之後朕恩顧飾終然一切禮儀並無於會典之外有所增益乃  
胡中藻與鄂昌往復酬詠自謂殊似晉人是已爲王法所必誅而  
其詩曰其夫我父屬妻皆母道之女君君一體焉得漠然爲夫君  
父人之通稱君應冠於父上曰父君尙不可而不過謂其父之類  
而已可乎帝后也而直斥曰其夫曰妻喪心病狂一至於此是豈  
覆載所可容者乎他如自桂林調回京師則曰得免我冠是出頭  
伊由翰林游擢京堂督學陝西復調廣西屢司文柄其調取回京

並非遷謫乃以挂冠爲出頭有是理乎又有曰一世璞誰完吾身  
飯恐破又曰若能自主張除是脫羶鎖又曰一世眩如鳥在筱又  
曰蝨官我曾慚又曰天方省事應聞我又曰直道恐難行又曰世  
事於今怕捉風無非怨恨之語述懷詩又曰瑣沙偷射蜮饒舌狠  
張箕賢良祠詩又曰青蠅投昊肯容辭試問此時於朕前進讒言  
者誰乎伊在鄂爾泰門下依草附木而詩中乃有記出西林第一  
門之句攀援門戶恬不知恥朕初見其進呈詩文語多險僻知其  
心術叵測於命督學政時曾訓以論文取士宜崇平正今見其詩  
中卽有下眼訓平夷之句下眼並無典據蓋以爲垂照之義亦可  
以爲識力卑下亦可巧用雙關云耳至其所出試題內孝經義有  
乾三爻不象龍說乾卦六爻皆取象於龍故象傳言時乘六龍以  
御天如伊所言豈三爻不在六龍之內耶乾隆乃朕年號龍與隆



同音其詆毀之意可見又如鳥獸不可與同羣狗彘食人食牝雞無晨等題若謂出題欲避熟經書不乏閒冷題目乃必檢此等語句意何所指其種種悖逆不可悉數十餘年來在廷諸臣所和韻及進呈詩冊何止千萬首其中字句之間亦偶有不知檢點者朕俱置而不論從未嘗以語言文字責人若胡中藻之詩措詞用意實非語言文字之罪可比夫謗及朕躬猶可謗及本朝則叛逆耳朕見其詩已經數年意謂必有明於大義之人待其參奏而在廷諸臣及言官中並無一人參奏足見相習成風牢不可破朕更不得不申我國法正爾謬風效 皇考之誅查嗣庭矣且內廷侍從曾列卿貳之張泰開重師門而罔顧大義爲之出貲刊刻至鄂昌身爲滿洲世僕歷任巡撫見此悖逆之作不但不知憤恨且喪心與之唱和引爲同調其罪實不容誅此所關於世道人心者甚大

用俾天下後世共知炯鑒張泰開著革職拏交刑部胡中藻鄂昌已降旨拏解來京俟到日交大學士九卿翰林詹事科道公同逐節嚴審定擬具奏○命直省大吏保舉堪勝知府人員送部引見○庚寅 上還京師○諭軍機大臣等達爾黨阿奏帶領索倫兵三百名於三月初三日至軍營初六日起程繼大兵前進達爾黨阿所領係索倫勁卒又經伊自行揀選者著傳諭班第俟達爾黨阿兵到時急速前進務同阿睦爾撒納前隊哨探兵一併進發○飭貴川修火政○鄂昌以負恩黨逆奪職逮問○壬辰諭原任江南河道總督高斌本一居心忠厚人易爲屬員所愚又身有殘疾不能親身督率以致滋弊僨事國法所在固不可寬戴罪河干已經二載念係宣力舊臣敷歷年久方欲量給大臣職銜以爲餘年光寵今聞溘逝不及蒙恩殊爲可憫著賞給內大臣職銜俟伊子

高恆扶輿到京日賞內庫銀一千兩料理喪務○命直省甄別六年俸滿教職○癸巳諭張師載戴罪河干已經二載著加恩准其回籍所有未完應賠銀兩著交與尹繼善等酌量定限分年完繳○乙未諭軍機大臣等薩喇爾等奏稱扎哈沁得木齊巴哈曼集帶領三百餘戶來降扎哈沁宰桑敦多克帶領一千餘戶來降如卽細查伊等戶口恐反生疑惑隨將敕書給敦多克巴哈曼集各一道曉諭伊等使無驚懼仍令照舊安居薩喇爾辦理甚妥著傳諭班第阿睦爾撒納等料阿睦爾撒納前進似此投誠者必多俱可照此辦理○庚子諭滿洲風俗素以尊君親上樸誠忠敬爲根本自騎射之外一切玩物喪志之事皆無所漸染乃近來多效漢人習氣往往稍解章句卽妄爲詩歌動以浮夸相尙遂致古風日遠語言誕慢漸成惡習卽如鄂昌身係滿洲世受國恩乃任廣西

巡撫時見胡中藻悖逆詩詞不但不知憤恨且與之往復唱和實爲喪心之尤今檢其所作塞上吟詞句麤陋鄙率難以言詩而其背謬之甚者且至稱蒙古爲胡兒夫蒙古自我朝先世卽傾心歸附與滿洲本屬一體乃目以胡兒此與自加詆毀者何異非忘本而何又如鄂昌家查出塞爾赫曉亭詩鈔內有作明泰妾杜貞姬詩一首初似明泰身遭不幸本非其罪者及查閱原案始知明泰身爲協領侵蝕兵丁錢糧其罪本卽應正法我皇考世宗憲皇帝如天之仁將伊解送甯夏永遠枷號實屬格外寬典而塞爾赫所作詩序但知贊其妾爲貞姬遂飾爲仇家行刺等語此直變亂黑白不自知其矯誣矣究之明泰今竟以占田謀殺二命正法夫以如此惡人而有貞姬爲妾之理乎夫滿洲未經讀書素知尊君親上之大義卽孔門以詩書垂教亦必先以事君事父爲重若讀

書徒剽竊浮華而不知敦本務實之道豈孔門垂教之本意况藉以詆呵譏刺居心日就險薄不更爲名教罪人耶此等弊俗斷不可長著將此通行傳諭八旗令其務崇敦樸舊規毋失先民矩矱儻有託名讀書無知妄作侈口吟詠自蹈龔陵惡習者朕必重治其罪○壬寅薩喇爾等奏遣侍衛瑚集圖等齎敕往諭噶勒藏多爾濟等三月初十日阿巴噶斯舊宰桑德濟特之弟及子來稱我等宰桑爲達瓦齊殺害今天兵將到願率屬效力十三日布魯古特之得木齊巴拉等三人來稱達瓦齊暴虐困苦不堪日望天兵速至今諾海奇齊等三十餘台吉並我屬下願投誠又業克明安輝特台吉托博勒登族弟巴朗來迎告稱我兄因臂折不能騎馬遣我率屬投誠又同巴朗來之噶勒雜特得木齊博勒坤車凌們綽克率屬來降臣等宣旨曉諭賞茶葉安插各本處十四日巴爾

瑪得木齊伯克勒特收楞額庫魯克等來稱我等原係巴爾瑪部  
來扎哈沁住已十餘年聞天兵將到願率舊宰桑噶齊拜之子圖  
爾塔默特屬戶投誠復據瑚集圖等帶領噶勒藏多爾濟所遣迎  
接之宰桑扎爾布多爾濟來稱恭捧敕書到額林哈畢爾噶之羅  
克倫噶勒藏多爾濟跪聽稱 大皇帝洞鑒我處情形達瓦齊殘  
虐眾心解體我與彼勢均不相侵犯自篡奪台吉以來我屢勸不  
從數年不通信去歲向我調兵我不發今年令我備兵一萬我不  
備大兵過時我屬俱照常耕種今聞恩旨願率屬投誠諭軍機大  
臣等據薩喇爾等奏噶勒藏多爾濟率眾投誠看來大功告成在  
指顧閒不勝欣慰薩喇爾遵朕訓示動合機宜實屬可嘉俟功成  
後加恩優敘先將朕所佩荷包賜予並賞給雙眼翎以示優獎噶  
勒藏多爾濟乃準噶爾大台吉所屬之人甚眾著薩喇爾卽同扎

拉豐阿鄂容安車凌車凌烏巴什車凌孟克降旨曉諭朕聞伊來降甚爲喜悅特遣侍郎玉保前往降旨獎諭因道遠不能多賚什物先將朕御用數珠荷包等賜予俟大功告成後更加殊恩寵錫天朝此次用兵實因準噶爾地方互相殘殺民不聊生是以特命六師前來拯救俟平定準噶爾後令四衛拉特人等照舊安居並封王爵共享昇平噶勒藏多爾濟旣爲準噶爾大台吉卽封爲綽羅斯汗其阿睦爾撒納應封輝特汗車凌應封杜爾伯特汗班珠爾應封和碩特汗同至熱河朝覲大加宴賞故先爲宣示俾汝知之再於投降各台吉等亦降旨宣諭汝等傾誠向化皇上俱深爲優獎因汝等戶口多寡差等尙未周知是以未頒賞賚什物一俟玉保查奏卽行賞給車凌等帶至熱河入覲應賞給爵秩者亦卽給予可一一曉諭俾伊等踴躍歡欣佇荷朕恩又諭噶勒藏多爾

濟乃準噶爾大台吉今率所屬來降平定準噶爾大功告成必速  
此實上天眷佑大兵所到不煩一矢皆已稽首歸誠著將薩喇  
爾原奏鈔寄班第阿睦爾撒納閱看料沙克都爾曼濟此時亦當  
由北路來降果爾阿睦爾撒納可卽宣諭汝係大台吉大皇帝必  
封以王爵且我等俱叨受天恩汝復更何疑慮仍將何時投誠之  
處速卽奏聞至沙克都爾曼濟等來降後亦卽應令伊等入覲西  
路著派扎拉豐阿北路著派阿蘭泰同車凌等帶領伊等由阿爾  
台前至熱河瞻仰朕躬以地處口外甚爲涼爽於蒙古人頗相宜  
也再應入覲之人儻爲數無多卽俱令前來如因人眾乘傳稍難  
卽令大台吉數人先來餘人另爲一班俟明年入覲亦可仍將見  
在前來人數及何日起程之處奏聞其應封爵秩之人亦應查辦  
且查封時卽可灼知其戶口多寡之數阿睦爾撒納等並應將從



前先至熱河如何深受朕恩之處詳悉曉諭俾伊等共知慶忭也  
○癸卯諭西師報捷諸部願入版圖日出入晝夜節氣時刻宜載  
入時憲書頒賜正朔以昭遠裔向化之盛侍郎何國宗著加尚書  
銜往該處測度繪圖呈覽○吏部議江西按察使范廷楷刑求謝  
祥一案應革職巡撫范時綬降二級調用得旨范廷楷著革職來  
京該部帶領引見范時綬著於補官日降二級用○協辦陝甘總  
督尙書劉統勳奏遵旨查出鄂昌詩藁札藁及書札臣與鄂昌共  
事甘省見其書詞閃爍好爲隱飾意其不過遇事多疑識見鄙瑣  
今閱札藁除發價派屬員代買物件等事罪止不應外至如聞伊  
弟鄂容安將有北路之命遂有奈何之辭又於史貽直則夤緣納  
賄於黃廷桂則舞弊市恩竇出意料之外謹籤進得旨汝如此不  
瞻顧直奏何愁不永受朕恩耶勉之

夏四月甲辰朔諭屠嘉正不勝按察使之任著降補貴州古州兵備道所遺貴州按察使員缺著崔應階補授○丙午諭軍機大臣等據阿睦爾撒納奏額林哈畢爾噶之宰桑阿巴噶斯等迎接我兵投誠前來阿睦爾撒納卽曉諭撫慰遣人收服伊等屬下人眾又將我兵分路前進阿睦爾撒納親身帶領先往集賓鄂拓克處收服人眾辦理頗中機宜阿巴噶斯烏勒木濟哈丹俱係準噶爾舊日大宰桑之子孫今旣誠心歸順朕深爲眷念著加恩將伊三人俱授爲散秩大臣先賞給孔雀翎俟另遣御前侍衛齎衣帽等物前往頒賜卽將此旨先行曉諭伊等知之再觀阿巴噶斯之詞尙未悉噶勒藏多爾濟業已投誠今西路已遣人往收噶勒藏多爾濟將此一併曉諭阿巴噶斯等知之○丁未諭軍機大臣等胡中藻自回籍後所作詩藁甚少且其詞氣與刻集迥異必由先已

知覺訊據胡中藻有廣信府親戚張紹衡自京捐納回南至伊家  
弔唁見書架上有堅磨生詩集刻本因說此書已達御覽胡中藻  
問爾何所聞張紹衡答以裘曰修卽曾說過之語遂遣人詢之伊  
兄張紹渠據稱張紹衡上年三月回家此後並未來京亦未到伊  
任所等語著傳諭胡寶琮卽速提張紹衡到省審訊張紹衡是否  
聞之裘曰修如何向伊說知是否屬伊傳語胡中藻伊如何傳述  
之處一一訊取確供在張紹衡不過無心傳述有則不必躲避無  
亦不可妄承或伊別有來歷總期訊出實在情形使此事明晰如  
張紹衡能將實情供出尙無大咎若枝梧掩飾亦必終於水落石  
出該撫先將供情由驛馳奏一面將張紹衡押送來京質對再胡  
中藻在本籍曾刻詩斗方詆毀地方官其中必有關涉朝政處何  
以查送雜稟詩片內並無此件該省如有人收存務須查追再胡

中藻家中書籍內有豫變紀略二本複齋錄六本查係何等書有無關緊一併送來○戊申諭藩司爲錢糧總匯庫貯銀兩向成弊蔽歷經釐剔仍未肅清卽如川省撥解陝甘軍需銀兩乃係經徵正項而鄂昌與黃廷桂書稱解到軍需青潮不足十分之三以撥兵餉雖屬不可若以採買軍需各物及運腳等項尙屬無礙已諭司照數兌收通融搭用等語協餉撥從鄰省青潮不足應責該省撫藩賠補足額何可委婉通融在鄂昌第藉以市恩而不知徇私舞弊已無所辭咎且青潮銀色旣云不可支給兵餉又以爲採買運腳豈不重累商民殊不知朕之恐累吾民之念尤切也且藩庫之項解自州縣州縣之款徵自閭閻徵收兌解稍有不足豈肯絲毫遷就以自貽厥累青潮之色何自而來此必有巧爲舞弊者況潮色不已必至短平弊竇日滋何所底止卽此而觀外省庫項殊

不可信向來伊等畏解部而利於協撥鄰省正恃有彼此通融之說而經生迂論至謂庫項當存留各省不當多入太府此非獨不通世務乃典守者流言惑聽便於蠹蝕營私耳甘省此案已交劉統勳確查辦理其各省藩庫銀兩亦當徹底清查著各該督撫秉公盤驗如平色虧缺卽著按數賠補仍將有無積弊具摺奏聞嗣後再有青潮不足等弊一經發覺惟督撫是問○諭史奕昂著來京以京員用甘肅布政使員缺著明德調補速赴新任史奕昂俟明德到甘交代再行起程周琬著補授四川布政使○諭軍機大臣等鄂昌署中查出字蹟有與黃廷桂札橐內稱撥解軍需銀兩青潮不足者十分之三已諭司委婉照數兌收通融搭用等語黃廷桂爲人尙屬老練且向來自稱孤立不倚樹怨於眾今觀鄂昌札內委婉通融等語則是黃廷桂在朕前博耿介之名而其實往

來交結非不可干以私者此次姑從寬免其治罪傳旨申飭嗣後  
務宜痛加悛改儻不知儆省則素日老體面恐終難保矣至協解  
軍需原係應行起運正項何至青潮不足其中或別有情節並著  
據實具奏○以公泰爲四川按察使

由甘肅安肅道遷

○庚戌諭軍機大

臣等據薩喇爾等奏帶領噶勒藏多爾濟投誠人等前進又羈留  
達瓦齊之來使帶往進發辦理悉中機宜朕深爲嘉悅佇望捷音  
閱伊奏內有噶勒藏多爾濟人尙明白但心迹叵測之語朕思噶  
勒藏多爾濟雖不可深信見在旣已投誠又帶兵一同前進諒亦  
無意外之虞若防範太過恐伊知覺反生貳心惟有示以大度默  
化其疑懼之意而已至朕以哈薩克錫喇稍有疑竇者蓋彼係北  
路之人如欲投誠何不卽由北路前來反避走西路其迹似有可  
疑然旣經投誠一同帶兵前進則疑竇亦自可釋且伊等人眾卽

有一二略涉可疑之人今達瓦齊已不克抵敵而我繼至之兵又接踵前進朕固知其無能爲也著將此傳諭薩喇爾等並將伊等前後奏摺錄寄班第等俾北路之兵亦急速進發尤爲得力再朕前曾降旨俟俘獲達瓦齊時卽行解送來京不可因已據伊犁稍容留頓著再傳諭兩路將軍或達瓦齊被擒或伊束手歸誠俱遵朕前旨辦理○諭和托輝特郡王銜青滾雜卜實心宣力辦事奮勉近因烏梁海宰桑都塔齊懇懇該處新降人眾脫逃卽告知將軍等派人將都塔齊拏獲正法甚屬可嘉青滾雜卜著加恩封爲郡王至班扎喇克察於奉委時不令都塔齊知覺妥協拘解亦屬可嘉著授爲頭等台吉○諭據班第等審訊努三烏勒登擬以應斬監候努三烏勒登收服扎哈沁後並不往拏巴朗實係貽誤軍機罪不可追但念伊二人去歲收服烏梁海扎哈沁時亦曾隨同

效力著加恩免其治罪仍留軍營以閒散效力贖罪○勒克以不

職革職調赫赫爲盛京戶部侍郎以奉寬爲盛京工部侍郎由內閣學

士○以富僧額爲盛京兵部侍郎由右翼總尉遷○王子致仕大學士張

廷玉卒遺疏聞得旨致仕大學士張廷玉歷事三朝宣力年久

勤勞夙著受恩最深前以其年屆八旬精神衰憊特加體恤准令

退休實朕優念老臣本懷至於配享太廟一事係奉皇考世

宗憲皇帝遺詔遵行而恩禮攸隆則非爲臣子者所可要請及朕

賜詩爲券又不親赴宮門謝恩自不得不示以薄譴用申大義今

張廷玉忠病溘逝要請之愆雖由自取皇考之命朕何忍違且

張廷玉在皇考時勤慎贊襄小心書諭原屬舊臣宜加優卹應

仍謹遵遺詔配享太廟以彰我國家酬獎勤勞之盛典其餘

應得卹典並著該部察例具奏朕於滿漢諸臣從無歧視賞罰予



奪一準乎情理之至當以孚天下後世之大公並將此通行傳諭知之尋予祭葬諡文和○癸丑永常奏臣於三月初九日領兵自巴里坤起程至阿克塔斯地方接副將軍薩喇爾等咨見帶兵向烏嚕木齊進發可速領兵前來接應臣卽抵察罕烏蘇距薩喇爾等所駐羅克倫地方約四百里報聞○甲寅大學士九卿翰詹科道等奏稱胡中藻違天叛道覆載不容合依大逆凌遲處死該犯的屬男十六歲以上皆斬立決張秦開明知該犯詩鈔悖逆乃敢助貲刊版出名作序應照知情隱匿律斬立決其與逆犯酬答之鄂昌侯孳解到日另議諭朕御極以來從未嘗以語言文字罪人在廷諸臣和進詩冊何止數千萬篇其中字句謬戾亦時有朕皆不加指摘何惡於胡中藻一人實以其所刻堅磨生詩內連篇累牘無非謗訕詆毀之詞不惟謗及朕躬且敢詆毀國家本朝撫

臨中夏百有餘年凡天下臣民自祖父以至孫子世蒙教養深恩而胡中藻逆倫悖叛乃至於此其得罪於列祖列宗者至大昔皇考於查嗣庭等案大示義正意狂誕之徒必應知所畏懼而不謂尙有胡中藻其人自不得不申明憲典以儆囂頑今大學士九卿翰詹科道等公同確訊屢經面對僉請處以極刑自屬按律定擬朕意肆市已足示眾胡中藻免其凌遲著卽行處斬爲天下後世炯戒胡中藻係鄂爾泰門生文辭險怪人所共知而鄂爾泰獨加贊賞以致肆無忌憚悖慢講張且於其姪鄂昌敘門誼論杯酒則鄂爾泰從前標榜之私適以釀成惡逆耳胡中藻依附師門甘爲鷹犬其詩中讒舌青蠅據供實指張廷玉張照二人可見其門戶之見牢不可破卽張廷玉之用人亦未必不以鄂爾泰胡中藻輩爲匪類也鄂爾泰張廷玉亦因遇皇考及朕之君不能

大有爲耳不然何事不可爲哉大臣立朝當以公忠體國爲心若各存意見則依附之小人遂至妄爲揣摩羣相附和漸至判若水火古來朋黨之弊悉由於此鄂爾泰爲滿洲大臣尤不應蹈此惡習今伊姪鄂昌卽援引世誼親暱標榜積習蔽錮所關於世道人心者甚鉅使鄂爾泰此時尙在必將伊革職重治其罪爲大臣植黨者戒鄂爾泰著撤出賢良祠不准入祀其配享 太廟係奉 皇考遺詔遵行與見在准張廷玉之配享相同應仍照舊張泰開本一庸懦無能之人其出貲刊刻由被勒索而序文又俱係胡中藻自搆張泰開著從寬免其治罪卽著釋放仍在上書房行走效力贖罪胡中藻之母年已八十其孫亦在幼穉及伊弟胡中藩等著從寬免其緣坐其胡中藻詩案內一應干涉之人除鄂昌俟解京之日另行審結外其餘俱著加恩一槩免其查究至於李蘊芳

身爲縣令乃以檢驗爲苦反覆嗟怨甚屬狂悖該撫見以貪婪題參革職俟審擬到日再降諭旨餘依議○諭軍機大臣等班第奏稱帶兵前往額爾齊斯之西喇托輝地方已與阿睦爾撒納前隊會合等語大兵進剿自宜略分先後經朕屢降諭旨令班第計阿睦爾撒納行程約離數日相繼前進一則阿睦爾撒納係準噶爾人眾知名之人今伊帶哨探兵前進人多認識於收服準夷人眾較易再前隊既有哨探兵復有將軍隨後帶兵繼進聲勢聯絡軍威益振如將軍副將軍合併一處則眾人惟知有將軍不復更知有副將軍轉置阿睦爾撒納於無用之地不足以展其所長殊於軍行無益前因永常急遽進兵其意惟恐薩喇爾首先成功伊不得同邀爵賞朕已降旨訓飭班第若亦存此意卽屬器量狹小豈朕委任之意卽使阿睦爾撒納先抵伊犁克奏膚功朕於班第亦

必加恩若先存急於赴功之意恐反不能承受朕恩矣著傳諭班第阿睦爾撒納伊二人務須酌量相離數日陸續進發不得同在一隊行走西路將軍永常薩喇爾等亦遵朕屢次諭旨前進毋得故違取戾○呼爾璘台吉納木奇等率屬來降願隨同進剿優賚有加○乙卯諭軍機大臣等永常奏稱索倫巴爾虎哲里木各處兵丁俱已至肅州伊接到諭旨卽擬回至肅州及抵巴里坤而各處兵丁俱已就道是以卽照薩喇爾等來咨領兵前赴烏嚕木齊駐紮以爲聲援俟索倫巴爾虎兵一到卽遣令前往策應其薩喇爾隊內撤出之甯夏莊浪涼州等處兵丁入於末隊兵內候哨探兵信息如無需用之處卽同綠旗兵一併撤回永常此次辦理尙合機宜朕前降旨令永常回至肅州特因永常於任內應辦之事全無籌畫惟務邀功輕進恐貽笑蒙古人眾耳今接薩喇爾咨卽

前赴烏嚕木齊以爲聲援應將駐紮兵丁留心約束俟薩喇爾有調取之信再親身帶兵前往儻因朕此旨仍復冒昧前進或一聞薩喇爾得伊犁之信思欲邀功輕舉妄動則大不可永常係將軍俟薩喇爾底定伊犁身臨其地一同辦理亦體制應爾彼時大局已定將應令駐守之兵卽分派駐守應撤回者卽飭交領隊大臣撤回伊犁酌量帶兵數百名從容前赴伊犁商辦善後事宜庶爲允協原不在此時急遽前進始足表其奮往之忱也永常可卽遵旨辦理毋得冒昧取戾至薩喇爾等將甯夏涼州莊浪等處疲乏兵丁裁汰顯係帶隊行走之大臣侍衛等不能善爲約束著永常查明據實參奏如稍有徇隱亦難逃朕洞鑒○丙辰大學士九卿等奏逆犯胡中藻已經正法請照查嗣庭逆案例停止江西鄉會試諭江西風俗器陵固應整飭大學士九卿所奏亦懲戒惡習之意

但因胡中藻一人而阻通省士子上進之階朕心實有所不忍所奏不必行嗣後如再有此等悖逆之案不但暫停數科必當大示義正以挽頽風該省士民其共知所儆○諭軍機大臣等永常以接濟口糧之事咨商薩喇爾據薩喇爾咨兵丁前抵伊犁及回至巴里坤兩月口糧尙不敷用永常卽由伊所領綠旗兵丁裹帶口糧內借支十日先行運往並將貝勒玉素布所有兒騾馬數百匹及從前所買羊一萬五千隻俱行運送接濟永常如此辦理乖謬已極薩喇爾見在領兵前進如須接濟口糧自必早爲籌畫今伊回文內所稱前抵伊犁及回至巴里坤兩月口糧尙不敷用並非見在急須接濟之語而永常一似刻不容緩卽將伊隊內兵丁口糧借支十日急行運往稍有知識之人斷不出此况朕從前降旨原指牲畜而言若無牲畜卽肉乾亦可運往而永常等亟亟籌運

口糧殊不可解此次所運十日口糧不准入正項開銷著永常自行賠補○戊午班第等奏臣等兩軍會合於三月三十日至額爾得里克地方馬力稍疲前至察罕呼濟爾地方乃各處通衢要路雖有班珠爾等在前似不若臣阿睦爾撒納親往籌辦一切察訪收服事宜較爲有益見公同商酌揀選馬匹臚壯兵丁一千名臣阿睦爾撒納等帶領先進其餘兵丁俱交班第等帶領相繼進發再從前聲援兵原派於布拉罕青吉勒兩處駐紮今屯田之地已定在伊蘇圖鏗格爾等處相隔遼遠守望難周應將青吉勒兵二千名移至察罕呼濟爾等處駐紮布拉罕兵一千名移至伊蘇圖鏗格爾之東鄂倫淖爾等處駐紮如此方可照管屯田之兵卽偶遇調遣亦可應時而集報聞○己未諭據莫爾渾奏總管赤倫稟稱伊等至汗哈屯地方諭令彼處烏梁海投誠果勒卓輝眾宰桑



等俱欲歸順惟布住庫猶豫不降等語果勒卓輝眾宰桑等皆願投降彼布住庫一人亦何能爲是以朕諭班第阿睦爾撒納俟得伊犁時著郡王成衮扎布量派和托固特兵丁及續進之索倫兵丁帶領齊達克赤倫前往招降明白曉諭如伊等迎降仍令安居本處至布住庫情狀可惡雖來降亦不可受卽令拏獲分與齊達克赤倫策根等作爲屬下赤倫著往伊遊牧安息俟成衮扎布帶兵前進移咨關會卽馳赴所約地方赤倫此次行走可嘉著加恩賞副都統銜並於餉銀內支給五十兩○庚申貴州巡撫定長奏請原任黔西州知州黃秉忠崇祀名宦祠諭定長此本甚屬錯謬黃秉忠乃黃廷桂之父計其宦黔以來六十餘載該州士民親身見之者尙餘幾人今日之合詞陳請豈出輿情公論且果有遺愛在人何以久未題達明係因黃廷桂見任總督且又與貴州連界

瞻徇市恩耳原本著發還定長著交部嚴加議處尋議照徇情例降二級調用得旨革職從寬留任○諭軍機大臣等前永常於帶往兵丁口糧內借支十日運赴薩喇爾前隊兵丁繼又請辦理一月口糧運往經朕明切降旨令其停止今又稱薩喇爾所領兵丁口糧止可供支至六月初旬今擬自哈密至烏嚕木齊設立臺站每臺撥駝五百隻陸續運糧接濟永常全不知事理之輕重顛倒舛謬至於此極果應如此辦理上年卽當豫備今明知成功甚速乃反爲此急遽倉皇之態不但不合機宜且使軍前兵丁聞知此信反將帶往口糧不加撙節希冀多得勢所必有且永常身爲將軍而刻刻以口糧不繼爲言更足以搖動眾心所關匪細永常辦理乖謬毋論其事斷不可行卽如永常所奏辦理恐亦不能如期運到也至茶葉一項乃蒙古所最需用者運送亦較輕便已令劉

統勦派員運往俟運到時薩喇爾酌量兵丁內實需接濟之人卽行賞給伊等或需用茶封或換易牲畜皆屬有益若無需接濟則留作平定伊犁後賞給新來投降之人亦可著薩喇爾卽遵旨辦理再從前永常將接濟口糧之處咨商薩喇爾扎拉豐阿鄂容安卽應明白指示乃以前抵伊犁及回至巴里坤兩月口糧尙不敷用之語含糊咨覆亦屬不合卽如平定伊犁後將軍大臣官兵等駐紮彼處亦豈有源源運糧接濟之理卽應照朕前降諭旨將收取達瓦齊所有牲畜備用儻有不敷則以茶葉銀兩向厄魯特回子等換易口糧辦理分給見在運糧之事固無庸議及卽大功告成後朕或遣侍衛官員前往彼處或由彼處遣人進京均應照喀爾喀掣取烏拉例行斷無裏糧行走之理將此傳諭薩喇爾伊到伊犁後會同班第阿睦爾撒納等入於應議事內妥協議奏又諭

永常等摺奏據薩喇爾咨運到十日口糧已分給兵丁見在成功  
甚速所有續辦一月口糧不必再運卽留於烏魯木齊地方俟撤  
兵時再行支給永常屢以接濟口糧爲言經朕詳悉飭諭今薩喇  
爾以不須接濟咨覆果不出朕之所料愈見永常辦理乖謬看來  
永常不但不及薩喇爾且徒爲薩喇爾所笑伊尙時時獨逞意見  
欲炫其長殊堪駭異嗣後毋得似此多事儻復蹈前轍朕必不爲  
寬貸○以阿思哈阿桂俱爲內閣學士阿思哈由布政使銜吏部郎中阿桂由內閣侍讀學士  
遷○丙寅諭軍機大臣等阿睦爾撒納等領兵至察罕呼濟爾地  
方尙未知達瓦齊信息見在進兵至額米爾等處相機辦理並遣  
人偵探巴特瑪車凌實在信息籌辦俱合機宜自必迅奏膚功朕  
意察罕呼濟爾地方尙未得達瓦齊信息蓋因去歲至今準噶爾  
全部攘奪無已復經巴特瑪車凌及哈薩克巴朗等擄掠夷眾皆

無棲止之地星散奔逃是以如入無人之境達瓦齊料必不能固守如果能固守則噶勒雜特之哈薩克錫喇又豈肯避走西路耶看來達瓦齊勢已瓦解阿睦爾撒納惟加意奮勉迅奏膚功副朕鄭重委任至意○班第等奏臣等與阿睦爾撒納等陸續前進在察罕呼濟爾地方會軍因未得達瓦齊信息阿睦爾撒納已領兵前往額米爾等處臣思大兵見在深入臣等所領兵馬休養數日益覺飽騰見選兵八百名令瑪木特阿蘭泰帶領先行會同阿睦爾撒納一併進發尙餘兵八百名臣班第隨後帶領接應報聞○丁卯薩喇爾等奏臣等領兵前進陸續招降各部人眾見據綽囉斯台吉衮布扎卜等部陸續來降共四千餘戶內和卓木原係葉爾羌喀什噶爾回部之長因策妄阿喇布坦時羈留伊父爲質未經放回將屬下三十餘戶率領來歸臣俱令各回原處游牧再葉

克明安合吉巴雅爾噶勒雜特宰桑哈薩克錫喇等因比年擾亂生計貧乏請給地耕牧臣等卽令往吐魯番耕牧又額林哈畢爾噶等處居住之人前以阿睦爾撒納被哈薩克搶掠生計亦艱因將阿睦爾撒納屬下未經帶往二百餘人及額林哈畢爾噶本處窮夷八百餘戶俱令在額林哈畢爾噶等處居住附入有牲畜之扎哈沁宰桑敦多克等屬下俾給與籽種令其耕牧再噶勒藏多爾濟帶領伊姪扎那噶爾布見隨臣效力事事俱遵指示形迹並無可疑臣等留辦數日此際想達瓦齊已得兩路大兵前進信息若不遣人招服恐其聞風遠颺因繕檄鈐印曉諭利害飭侍衛塔奇圖等由烏蘭烏蘇地方前往傳示諭軍機大臣等薩喇爾奏綽羅斯台吉衮布扎卜等各帶領戶口前來投誠及飭侍衛塔圖奇等前往曉諭達瓦齊辦理諸事悉合機宜朕心深爲嘉予惟佇候

伊等捷音薩喇爾務宜加意奮勉迅奏膚功以副委任再朕觀尼瑪所供達瓦齊見在情形將來薩喇爾遣人曉諭後固必前來投誠或此時達瓦齊一聞大兵信息卽遣人至軍前請降皆未可定如果來降薩喇爾卽一面受降一面仍帶大兵進發辦理一切善後事宜並宣諭達瓦齊毋令稍生疑懼遵照前旨解送京師其噶勒藏多爾濟率領伊姪願隨大兵前往效力諸事俱遵照薩喇爾等指示辦理亦屬可靠薩喇爾等毋庸過於疑慮轉致別生事端至投誠綽羅斯台吉衮布扎卜及布庫努特當扎木素等率眾歸誠俱應卽加賞賚但尙未查明伊等名目等次是以尙未頒賜賞賚著薩喇爾至伊犁時卽行查明分別具奏朕自加以厚恩先將此旨曉諭伊等知之至投誠之和卓木原係葉爾羌喀什噶爾回部之長羈留準噶爾爲質未經放回情甚可憫著薩喇爾卽將伊

派令前來入覲至回營時仍令復回原部並將此諭行告知俾知  
感戴薩喇爾此番籌辦妥協深屬可嘉著賞賜朕御用寶石數珠  
一盤扎拉豐阿鄂容安並著賞給荷包鼻煙壺以示優獎○戊辰  
琉球國世子尙穆遣陪臣入貢請封允之○己巳賜琉球國王改  
鑄清篆印○壬申阿睦爾撒納等奏四月初九日有集賽宰桑齊  
巴汗迎於途次情願歸附效力軍前並告稱我等五集賽共六宰  
桑除杜爾把齊巴汗見在伊犁其餘宰桑達瓦僧克爾策伯克達  
什策凌皆在遊牧地方我聞大兵雲集卽來投誠伊等居住俱遠  
想一聞信亦必投降見今達瓦齊日在醉鄉屬下離心今年二月  
達瓦齊因征哈薩克令五集賽出兵五千並未聽從又十數日前  
巴朗帶人三十餘戶至集賽地方馬匹俱爲我等掠取見今流落  
宰桑達什策凌附近地方臣等卽令齊巴汗帶兵五十名隨大兵



前進查五集賽既不聽達瓦齊調遣自必陸續歸附但統兵前往  
恐遊牧人眾轉生疑懼因令和托輝特副都統敦多卜宰桑錫哈  
瑪前往收服卽於彼處派得木齊兵丁將巴朗擒拏並遣副都統  
職銜達什敦多卜宰桑烏勒木齊前往招降都噶爾又將軍班第  
咨送自伊犁前來之們都哈什哈告稱伊係臣阿睦爾撒納之人  
自伊犁起程距今止十三日大兵進剿達瓦齊尙未聞知見欲往  
征哈薩克集兵數千名於額貝諾爾地方令輝特台吉和通額默  
根管領離此僅一日之程臣卽遣人將臣投順以來得蒙厚恩任  
用並見在帶兵前進情形告知和通額默根諭令早降又聞達瓦  
齊遣宰桑恩克博羅特吞圖布往集賽調取兵丁二人係達瓦齊  
信用之人若能擒獲達瓦齊情形俱可洞悉因派班珠爾等帶兵  
三百進攻務期擒獲諭軍機大臣等阿睦爾撒納奏稱集賽宰桑

齊巴汗率眾投誠卽隨大兵前進並遣副都統敦多卜前往集賽  
招降各處宰桑俾卽派兵擒獲巴朗又遣達什敦多卜招降宰桑  
都噶爾辦理俱合機宜朕深爲嘉予大功旦晚可望告成阿睦爾  
撒納等務當益加奮勉以副委用至齊巴汗翼沐朕恩親身迎接  
大兵甚屬可嘉著加恩授爲散秩大臣並遣侍衛德善齋孔雀翎  
帽衣服荷包等物前往賞賜仍將大功告成後另加恩賞之處諭  
伊知悉再敦多卜達什敦多卜前往招降之集賽二宰桑及宰桑  
都噶爾並在伊犁之宰桑杜爾把齊巴汗一聞信息亦必陸續踊  
躍來降但俟奏聞後再頒賞賜未免遲滯將此四人亦照齊巴汗  
俱授爲散秩大臣各賞給孔雀翎帽衣服荷包等物俟伊等投誠  
前來卽行賞給其台吉和通額默根爲達瓦齊統領兵丁駐紮額  
貝諾爾地方阿睦爾撒納已遣人前往招降諒亦卽來投誠但不

知伊係何等台吉尙未奏明量給倭刀皮帽一頂數珠一盤亦交與德善齋往豫備賞給嗣後有似此等投誠台吉俱照此頒賞其應得職銜著阿睦爾撒納查明伊等帶來戶口多寡分別具奏俟其赴熱河入覲時再行賞給阿睦爾撒納此次辦理可嘉著加恩賜與朕御用珍珠數珠一盤荷包鼻煙壺各一件色布騰巴爾珠爾青滾雜卜瑪木特阿蘭泰班珠爾訥默庫車布登扎布俱著賞給荷包鼻煙壺各一件以示獎勵○癸酉諭碩色等奏宮爾勸名下應追銀數原籍及任所貲財足數抵補其餘銀兩及東省見存貲產請令變價解交內務府查收等語碩色等所見甚小宮爾勸久任藩司大員辦理銅廠侵隱滋弊是以查產抵扣以爲營私不職者戒今經審明追賠之項俱已扣清歸款此外所餘若查無可惡情罪自應給還本人即使情罪可惡不應給還亦止當留充地

方公用該省從前吳尙賢以內地奸民越境招搖勾引漁利所得財產應行入官宮爾勸自係地方官與此絕不相類該督等何得因有成案遂不論輕重一律率請變價交內務府殊屬錯謬著嚴行申飭

五月乙亥諭軍機大臣等班第奏阿睦爾撒納文稱前後隊兵丁口糧未全裹帶或將牲畜易換或將煙茶銀兩運解沿途自行交易阿睦爾撒納此言甚屬錯謬兵丁口糧未全給領者原爲伊等在途難於攜帶起見卽陸續給領亦自有一定日期豈有原領口糧尙未全帶反行續給之理又伊稱兩路兵會合駐紮若不豫辦接續口糧似乎少費籌酌兩路兵一經會合卽當長驅直入又何庸駐紮守候伊原奏四月十五日可抵博囉塔拉地方今已至十七日尙駐紮集賽查伊屬下之人此事儘可於成功後從容辦理

何必亟亟查辦不過藉查人爲詞逗遛時日竟無迅速奏功之意  
况欲將伊查屬下人遷移至博囉塔拉地方明係欲藉此時將伊  
屬下人等豫爲糾合俟抵伊犁後將盡攫其財物可以就近竄逸  
逞其狡詐耳朕用人推心置腹何嫌何疑如係無關輕重之小過  
不妨置之度外似此貪詐狡獪伎倆畢露豈能逃朕洞鑒班第須  
察其心迹密加防範不得稍有疏虞再阿睦爾撒納文內又以養  
贍準噶爾窮人爲言此事斷不可行朕另行降旨曉諭可將此密  
諭班第知之又諭據班第奏阿睦爾撒納咨商大兵前至伊犁撫  
定彼處人眾看來窮困者必多其作何養贍之處須豫爲籌辦此  
奏所見非是從前杜爾伯特親王車凌輝特親王阿睦爾撒納等  
遠離游牧前來輸誠朕是以加恩賞賜養其屬下人眾今遣兵平  
定準噶爾地方正爲救伊等於水火令其安享太平若論窮人內

地外地各部落蒙古內何處無之博施濟眾勢所不能伊等於歸  
順後一槩妄冀養贍無論萬里之遠運送口糧難以辦理且試問  
伊等未歸順以前其所資以養贍者何在著卽傳諭班第阿睦爾  
撒納等俟大功告成後將實在窮困者一一查明或於伊等富戶  
內令其兼養卽欲更爲籌辦不過卽以蒙古自養之道令其各籌  
生計若必須一一辦理養贍斷不可行再阿睦爾撒納等雖不能  
照原奏日期於四月十五日抵博囉塔拉地方此時定已到彼會  
合直抵伊犁矣大功一成卽遵朕屢次所降諭旨將在伊犁隨將  
軍大臣等駐紮兵丁酌量存留其撤回官兵卽速陸續分起凱旋  
班第等公同妥協辦理○戊寅諭軍機大臣等據薩喇爾奏新降  
額林哈畢爾噶等處台吉宰桑俱傾心歸順冀受恩澤惟察其情  
形俱有不願封噶勒藏多爾濟爲汗之意懇將此旨暫行停止薩

喇爾相機酌辦甚可嘉予著卽傳諭王保將朕所降封噶勒藏多爾濟爲汗之旨不必宣諭薩喇爾自進兵以來諸事奮勉今又能詳察彼處衆人情形爲此陳奏甚合機宜不特額林哈畢爾噶等處之台吉宰桑等情有不願儻準噶爾全部誤認以噶勒藏多爾濟代達瓦齊爲汗展轉傳播關繫更大今暫行停止不卽宣諭則衆人俱無猜疑於進兵事宜大有裨益薩喇爾著加恩賞銀一千兩卽由此處遣人送至伊遊牧以示鼓勵○己卯移甘肅鎮番縣柳林湖通判駐甘州府撫彝堡○薩喇爾奏四月十三日得木齊烏勒斯等擒獲達瓦齊遣往哈丹阿巴噶斯之錫伯克沁等十三人臣等詢知達瓦齊尙在伊犁近年甚爲窮迫因額林哈畢爾噶等處在彼竊掠滋擾遣伊等前往辦理到哈丹地方始知該處台吉宰桑俱已歸誠臣等見釋錫伯克沁同巢將 皇上安撫準噶

爾全部之旨及各部落輸誠歸附之處剴切曉諭並令布告附近  
達瓦齊之烏魯特克勒特綽和爾等部落招其來歸則達瓦齊必  
勢窮力竭更無容身之地報聞○庚辰諭軍機大臣等阿睦爾撒  
納等領兵抵五集賽招降宰桑達什策凌都噶爾等並擒獲逃人  
孟克特穆爾巴布爾葛蘇爾羅卜藏西喇卜等特請俟擒獲巴剛  
一併解送來京阿睦爾撒納等辦理甚合機宜但此次曾否到博  
囉塔拉捐內並未奏及惟於報封外填寫自博囉塔拉起程字樣  
想彼處地方頗大伊等或纔至邊界或到時尚未見薩喇爾是以  
未及聲明從前薩喇爾奏阿睦爾撒納約於二十一日可到此時  
想已經會合早抵伊犁捷音自可計日而待再貝子克什克公多  
爾濟車登等帶侍衛台吉等往追達瓦齊所遣宰桑恩克博羅特  
吞圖布等乃於中途誤中恩克博羅特等之計至今遠颺如恩克



博羅特果係換馬逃去豈有復寫字縛於馬鬣自言逃去甚遠之理此不過欲緩我兵追趕耳使克什克等果能奮往直前必將恩克博羅特卽行擒獲但其擒獲與否於事關繫無甚緊要且恩克博羅特卽已逃去亦必取道博囉塔拉始抵達瓦齊處則此時路經博囉塔拉或已被薩喇爾擒獲亦未可定其巴朗孟克特穆爾係首先脫逃之人情甚可惡著阿睦爾撒納卽遣人將巴朗擒獲同孟克特穆爾一併解送來京其餘被脅同逃之人送往杜爾伯特遊牧處交與舒明約束收管○命翰林院侍講全魁編修周煌冊封琉球○辛巳諭軍機大臣等班第奏稱阿睦爾撒納遣策布登扎布帶領招服和通額默根宰桑鄂哲特所領兵五百名俱已收降朕前於阿睦爾撒納具奏時已知其必來歸附是以遣侍衛德善將賞賜之物豫行齎往今大兵甫到果卽納款來降甚屬可

嘉著班第於德善到軍營時卽將所齎賞和通額默根之物傳旨頒賜其賞給品級之處俟伊來京入覲時另降諭旨○准外任旗員迎養○班第等奏見在收服之塔本集賽約計戶口八千有餘伊等所居遊牧寬廣且係新附須駐兵防守應將駐紮察罕呼濟爾兵二千移於齊爾烏遜呼濟爾地方駐紮烏蘭淖爾兵一千移於察罕呼濟爾地方駐紮既資防範兼可調遣報聞○壬午諭貝子銜策布登扎布招降和通額默根甚屬出力著加恩授爲貝子副都統銜達什敦多布授爲散秩大臣們都哈什哈賞給翎帽衣服以示獎勵○諭軍機大臣等班第等奏見在招降之和通額默根係伊弟格勒克雅喇木丕勒二人迫令同來宰桑鄂哲特集賽宰桑達什策凌策伯克巴桑因見往擒巴朗之兵始來歸順俱非實心向化阿睦爾撒納是以未將伊等帶往軍中亦不留在此

遊牧處令於附近地方暫居如此則既可暗中防範而後來歸順者亦不至啓其疑懼之心其喀什噶爾之巴喇特和卓見在帶往軍中俟成功後令其招降葉爾羌各處人眾阿睦爾撒納用心周密動合機宜深可嘉予著先賞銀三千兩遣人送往伊遊牧處今兩路兵已抵伊犁捷音一到當大加賞賚也格勒克雅喇木丕勒著照賞和通額默根之例各賜大小荷包倭刀皮帽一頂數珠一盤其給與職銜之處俟入覲後再降諭旨鄂哲特係管理一千餘戶之宰桑或給與散秩大臣或一等侍衛之處交班第等酌議給賞達什策凌策伯克巴桑俱著授爲散秩大臣喀什噶爾之巴喇特和卓一聞哈丹來歸卽率兵效順且情願往招喀什噶爾葉爾羌人眾心甚可嘉巴喇特和卓並伊兄畢爾干俱各賞大小荷包貂帽一頂數珠一盤巴喇特和卓俱與入覲人等同至熱河再給

職銜庫圖齊納爾之宰桑索薩資於們都哈什哈一到帶兵來歸  
將達瓦齊所遣之綏綢鄂勒錐圖一併擒獻亦甚可嘉並著授爲  
散秩大臣賞給翎帽衣服著侍衛瑚賈圖馳驛送往仍將事定後  
再行施恩之處詳悉曉諭伊等知之○班第等奏據薩喇爾文稱  
聞達瓦齊已往察卜齊雅勒地方距博羅布爾噶蘇台道路甚近  
若俟兩路會齊不免迂回西路見在輕騎徑往博羅布爾噶蘇台  
山梁進發其北路大兵卽從庫蘇木蘇克前進互爲聲援臣等隨  
於四月二十三日輕騎起程過庫克托木前進額駙色布騰巴勒  
珠爾等亦至博囉塔拉見在會兵進剿報聞○甲申諭軍機大臣  
等班第奏宰桑烏魯木偕伊叔庫綳帶領四百餘戶來降又宰桑  
庫本將達瓦齊差往和通額駙根使人巴朗察汗擒拏解送甚屬  
可嘉達瓦齊向眾鄂拓克派兵令台吉諾爾布統領在特里木哈

達防守已遣侍衛肅庫納等傳旨招降看來大兵所至勢如破竹  
阿睦爾撒納等辦理甚合機宜見在達瓦齊計窮力竭諒必早已  
就擒諾爾布僅帶兵數百名在特里木哈達無關緊要來降固可  
卽不來降亦更無可以逃匿之處矣所有率屬投誠之宰桑烏魯  
木並挈獲賊使之宰桑庫本著加恩授爲散秩大臣加賜孔雀翎  
並賞衣帽荷包由驛馳遞交與侍衛瑚贊圖宣旨賞給其來降之  
台吉宰桑等先將爲首之人酌量賞賜其餘未經查明伊等品級  
職分者俟將來熱河入覲後當分別等差大加恩賞著班第阿睦  
爾撒納薩喇爾等卽行曉諭知之○乙酉諭軍機大臣等據薩喇  
爾等奏領兵已過博羅布爾噶蘇台至登努勒台地方達瓦齊所  
屬並無人在彼防守其伊犁附近之台吉宰桑喇嘛等俱已遣人  
前往招降所辦機宜悉協不勝欣慰至所奏成功之後請停止伊

犁駐兵一事薩喇爾等蓋因準噶爾近年以來生計窮蹙若多駐官兵恐不無勞費起見耳朕前次諭令駐兵原非欲令永遠戍守以見辦四衛拉特旗分佐領並五集賽各鄂拓克人等及哈薩克布魯特邊界一切事宜若不令大臣駐紮無所統率遇有應行查辦之事僅交四衛拉特各部落汗等辦理究屬未協且旣駐大臣不能不酌量駐兵數百名或一二百名以備差遣至兵丁所需口糧或收取達瓦齊輜重什物或將諸鄂拓克應納貢賦徵收支給俱已足資應用著班第阿睦爾撒納薩喇爾等至伊犁時會同妥議具奏如量度情形並一二百名之兵均可無庸籌辦則但令大臣官員駐紮亦無不可不必拘泥朕前旨○丁亥諭班珠爾自同車凌等來降時朕卽加恩封爲貝子嗣因伊身故無子車凌等議將伊近族額布根之弟奇塔爲嗣著卽准其承襲扎薩克貝子所

有班珠爾屬下人等卽令奇塔管理○戊子諭軍機大臣等據班  
第等奏阿勒圖沁鄂拓克宰桑塔爾巴帶領伊二子及得木齊五  
員前來投誠塔爾巴係達瓦齊所派出兵之人聞大兵已至翼受  
朕恩卽行投誠甚屬可嘉著施恩授爲散秩大臣庫圖齊訥爾宰  
桑克什木善披領集賽宰桑莽爾一聞信息旋卽來降亦著授爲  
散秩大臣至庫圖齊訥爾之得木齊烏巴什爲眾人倡率投誠非  
其餘得木齊可比著授爲二等侍衛其餘得木齊曼集訥墨里濟  
爾噶爾錫喇巴圖爾和通瑪瑪什善披領集賽得木齊蘇克都爾  
格齊哈什哈古里特得木齊和通喀喇博羅莽爾伊什特克咱瑪  
博勒等俱著授爲三等侍衛卽賞給頂翎再道途遼遠賞賚什物  
不能多齎俟大功告成時再遣人前往頒賜仍俟伊等至熱河入  
覲時另予施恩著將此曉諭伊等知之○庚寅諭鄂昌身爲滿洲

乃在廣西巡撫任內與逆犯胡中藻唱和往來見其大逆不道之辭不但不知憤恨而且引爲同調喪心已極是以將伊拏解來京廷鞫之下伊亦俯首無辭惟稱萬死而已至伊從前身獲重罪但令坐臺已屬寬典而於伊署中查出詩藁書札其所著塞上吟一編則種種怨望不一而足但未至如胡中藻之大肆訕謗耳而於鄂容安之差往軍營則云奈何奈何滿洲舊俗遇有行師無不踴躍爭先以不預爲恥不謂竟有如此敗類也又與史貽直札藁內有玉成佳器之語朕初不知所指名問史貽直則據奏曾經致書通候並未有所請託今訊之鄂昌則供稱史貽直致書與伊有河道之缺已補甘藩之任尙懸望鼎力玉成等語而史貽直尙堅不承認及刑訊鄂昌又問及此條仍與初供無異鄂昌所犯之罪甚重何獨於此一事而茹刑堅執且伊向日尙與史貽直相厚何至



誣賴史貽直又已年老本不至因此事而革職刑訊也但爲伊子請託於前又不據實陳奏以圖掩飾且向日亦非安靜之人本應重治其罪念其邇年尙屬勤慎奔走著從寬以原品休致勒令回籍閉戶家居鄂昌負恩黨逆劾其情罪必應肆市方足蔽辜但伊尙能自知罪狀一一供認而於史貽直屬託書詞毫無隱諱致朕得明正官常有此一節著從寬賜令自盡將此通行曉諭知之○諭滿洲本性樸實不務虛名卽欲通曉漢文不過於學習清語技藝之暇略爲留心而已近日滿洲薰染漢習每思以文墨見長並有與漢人較論同年行輩往來者殊屬惡習夫棄滿洲之舊業而攻習漢文以求附於文人學士不知其所學者並未造乎漢人堂奧而反爲漢人所竊笑也卽如鄂爾泰係胡中藻素所尊重者然其詩中頗有戲謔鄂爾泰之句伊姪鄂昌見胡中藻悖逆之詩不

知憤恨反與唱酬實屬喪心之極又以史貽直係伊伯父鄂爾泰同年舉人因效漢人之習呼爲伯父卑鄙至此尙可比於人數乎此等習氣不可不痛加懲治嗣後八旗滿洲須以清語騎射爲務如能學習精嫻朕自加錄用初不在其學文否也卽翰林等亦不過學習以備考試如有與漢人互相唱和較論同年行輩往來者一經發覺決不寬貸著通行曉諭部院八旗知之○辛卯諭軍機大臣等據班第奏擒獲羅卜藏丹津派侍衛台布等解送來京並據達什敦多卜轉報額伯津宰桑所屬得木齊諾爾布扎卜巴顏轄將逃人巴朗擒獲同從前擒獲之孟克特穆爾一併派員解送前來羅卜藏丹津貢恩悖叛逃往準噶爾偷生三十餘年今兩路大兵直抵伊犁無路奔逃並將投降潛逃之巴朗一併擒獲實足以彰國憲而快人心著班第等令解送之侍衛等沿途小心防範

仍派乾清門侍衛前往張家口俟羅卜藏丹津等一到卽速解京  
候朕擇日獻俘明正典刑其擒獲巴朗之諾爾布扎卜巴顏轄奮  
勉可嘉應從重加恩但前此投降人內並未見有額伯津宰桑及  
巴顏轄之名著班第查明如係新來投降者卽照投降宰桑之例  
宣旨授爲散秩大臣並賞給世襲雲騎尉銀一百兩以示獎勵再  
副都統達什敦多卜有無協力擒獲巴朗班第等亦卽查明奏聞  
候朕酌量加恩○諭前同巴朗潛逃車凌孟克之孫巴布勒等見  
已一併擒獲上年貝勒車凌孟克及伊子巴朗冀受朕恩前來歸  
順乃車凌孟克赴熱河入覲時巴朗乘閒逃脫不獨負朕厚恩抑  
且悖逆其父情罪甚重國法難寬朕已降旨將伊解送來京治罪  
但念車凌孟克誠心感戴在軍前奮勉行走伊孫巴布勒或爲巴  
朗所偪或與巴朗同謀俱可置之不問總因加恩車凌孟克特予

寬宥著薩喇爾將此傳諭貝勒車凌孟克知之其巴布勒至烏里雅蘇台時卽著莫爾渾等遣人送至車凌孟克游牧處居住○命黃廷桂爲武英殿大學士兼吏部尙書仍留四川總督任調王安國爲吏部尙書以楊錫紱爲禮部尙書原署湖南巡撫左都御史何國宗爲左都御史李侍堯爲工部侍郎由熱河副都統遷○調陳宏謀爲湖南巡撫以吳達善爲甘肅巡撫由工部侍郎遷○以圖爾炳阿爲河南巡撫由布政使遷○王辰阿睦爾撒納奏臣等進兵至伊犁沿途厄魯特回子等牽羊攜酒迎叩馬前臣等宣布恩旨無不額手稱慶所在人眾耕牧如常毫無驚懼臣等撫定賊巢卽渡伊犁河北務擒達瓦齊獻俘諭定邊左副將軍阿睦爾撒納等奏報大兵直抵伊犁準噶爾部眾人等載道歡迎見已撫定賊巢達瓦齊遁竄遊魂可計日就縛等語準噶爾一事實我 皇祖仁皇帝 皇考世宗憲皇帝籌

辦未竟之緒卽朕御極以來亦屢准其請安貿易初未有興師致討之成心邇年因其篡奪相尋人心瓦解諸部台吉車凌車凌烏巴什及阿睦爾撒納等叩關內附先後踵至其人皆熟悉彼地情形洞曉軍務朕於熱河召見時伊等皆深知感激朕恩以願效前驅爲請是其勢有可乘機不容失因籌及兩路興師之舉而人心狃於久安在廷諸臣惟大學士傅恆與朕協心贊畫斷在必行餘無不意存畏蒞今日諸王大臣具在試各自揣本心方創議伊始確然信爲必當從事者誰乎甚至如策楞舒赫德身肩其任而懦怯乖張幾至僨事經朕降旨治罪而無識之徒未必不曲爲致惜由今日觀之則此二人當治罪乎否乎夫準噶爾一日不定則其部曲一日不安來歸之人將日益眾非得其地何以處之蓋揆情度勢今昔迥殊在 皇祖 皇考時適當其聲勢方張藩籬完固

彼得恃遠逋誅未及犁庭掃穴設處今日事機之會有不乘時決策迅奏膚功者乎卽朕籌辦之初亦未敢遽信大功計日可就是以禡牙推轂之典槩未舉行設或時會稍有濡遲朕亦惟有自爲引咎耳然究不肯以畏難之見徇浮論而失機宜且近日滿洲陋習假持重以文其退縮在朕前並不能據實陳奏一惟退有後言此風實可寒心見在師行未及半載初無血刃遺鏃之勞軍資諸費較前甫及十之一二卽喀爾喀部落亦並未以大兵經過稍有滋累而所至耕牧不移壺漿夾路爲亙古所未有試問前此之鯁鯁過計謂爲有損無益必不可行者今果有所損乎否乎果當行乎否乎皇祖平定朔漠詩中卽有力排眾議之語足見我朝家法獨運乾綱主持振作羣臣惟當竭心協志共思奮發有爲若一任因循不知其委靡頹敝流入何等矣故今雖值此捷奏頻仍

遐荒底定而朕心初不以爲喜惟有感戴 上蒼福佑 列祖貽  
庥與廷臣益加儆勛而已其身歷戎行諸臣調度合宜克成偉績  
應加懋賞用示酬庸阿睦爾撒納賞親王雙俸所屬護衛官員增  
添一倍加賞豹尾槍四桿其子著加恩封爲世子班第薩喇爾俱  
著晉封一等公並賞四團龍補服金黃縹朝珠瑪木特著晉封三  
等公仍賞二團龍補服雙眼孔雀翎俱准其常時服帶以示優獎  
色布騰巴勒珠爾著賞親王雙俸所屬護衛官員增添一倍扎拉  
豐阿著晉封郡王車布登扎布普爾普俱著晉封貝勒車凌著賞  
親王雙俸所屬護衛官員增添一倍車凌烏巴什班珠爾訥默庫  
俱著晉封親王車凌孟克著晉封郡王在事大臣官員兵丁著該  
將軍等分別等第造冊送部議敘參贊大臣達爾黨阿阿蘭泰等  
一併交部議敘兩路管理臺站官員亦著查明議敘大學士忠勇

公傅恆著加恩再授一等公爵以爲力矯積習爲國任事者勸軍機大臣等並著交部議敘所有一切應行典禮大學士會同各該衙門詳察具議以聞尋議大功告成所有告祭天地太廟

社稷

陵寢禮儀見在敬謹辦理其凱旋筵宴賞賚等事遵

旨於駐蹕熱河舉行至一切應行典禮敬稽舊典請擇吉加上

皇太后徽號進表行慶賀禮頒詔天下御製碑文勒石太學其

大兵所過之處及伊犁地方有應行勒石者亦請御製碑銘並

開館纂輯平定準噶爾方略從之○諭軍機大臣等準噶爾平定

兩路將軍大臣等朕俱已加恩鄂容安在參贊大臣任內奮勉行

走亦應加恩但伊從前有準噶爾不宜辦理之議伊父鄂爾泰與

大逆胡中藻師生交結伊兄鄂昌又與胡中藻附和黨同鄂容安

明知其事不行陳奏有負朕恩伊若不前往軍營原欲從重治罪



今因此次行走免其治罪卽係朕恩著將此傳諭鄂容安知之○  
癸巳諭準噶爾用兵上年朕恭謁 祖陵虔誠默禱今迅奏膚功  
理應告祭惟東巡尙未逾歲不欲以清塵除道重煩父老 永陵  
著派皇子永璋 福陵著派皇子永琪 昭陵著派皇子永城代  
行告祭禮○諭平定準部 孝陵遣皇子永璋 景陵遣皇子永  
城 泰陵遣皇子永琪代行告祭○諭協辦大學士阿克敦見患  
目疾給假調理未能速痊內閣辦事需人尙書達爾黨阿著馳驛  
來京協辦大學士事務其黑龍江將軍仍著綽爾多署理○諭河  
南布政使員缺著劉慥補授福建按察使員缺著史奕昂補授史  
貽直私書請託係伊自取之罪原與伊子無涉是以仍加錄用著  
將此旨諭令知之○諭大學士公傳恆以加賞公爵具摺奏辭情  
辭懇摯及召見之際又復面陳再四至於泣下並稱金川之役叨

封公爵已爲過分等語觀其不自滿假倍深兢惕信出至誠實將來可以永承恩遇之道朕心轉爲嘉慰應俯允所請用成厥志所有平定金川及準噶爾奏捷兩次功績均著併於見封忠勇公敕內以昭茂典仍於軍機大臣內交該部從優加等議敘○諭班第著封爲誠勇公薩喇爾著封爲超勇公瑪木特著封爲信勇公班第薩喇爾並著賞戴寶石帽頂以示優獎○諭軍機大臣等大兵平定伊犁所有應行入覲人等著班第阿睦爾撒納薩喇爾卽將派定人數若干何時可到之處一面奏聞一面將應辦事宜交兆惠等妥協辦理再哈薩克處應遵照從前所降諭旨遣人前往其曉諭哈薩克阿布賚之旨應告以哈薩克先與準噶爾互相構釁當天朝進兵之時正達瓦齊與爾等交爭因大兵前進達瓦齊始將擄掠爾等之兵停止今準噶爾地方已經平定俱爲臣僕凡前

次戕害爾等之事自可永行禁止爾等如願歸誠必普加恩澤若欲自爲部落亦止許靜守邊界毋得侵擾儻仍照前擄掠當發大兵征討將此明白曉諭視伊等情形若何卽行奏聞再策妄阿喇布坦噶爾丹策零俱係準噶爾台吉伊等見在如有子孫朕尙欲爲加恩如竟無嗣續深屬可憫著班第等查明策妄阿喇布坦噶爾丹策零墳塋照蒙古禮致祭一次仍由該鄂拓克人等內酌量派人永遠看守並歲行祭掃之禮將此通行曉諭準噶爾人等知之○丁酉軍機大臣等奏遵旨審訊張紹衡據供乾隆十八年十二月內表曰修實向伊說過堅磨生集恐已進呈之語與胡中藻原供相符表曰修仍堅不承認並稱本月十七日有翰林饒學曙至伊寓所說張紹衡在途有人往迎等語臣等卽傳訊饒學曙據供本月十七日在門首見張紹衡家人郝升知張紹衡將次到京

因往裘曰修家探問又據張紹衡供於十五日在任邱縣伊弟張紹渠與伊相見後卽遣郝升來京告知饒學曙及至彰儀門外又見郝升迎候傳饒學曙語屬其不可說出裘曰修等語此事展轉質對裘曰修與張紹衡說及之處已無可置辨乃一味隱諱殊屬不合請將該侍郎交部嚴議張紹渠饒學曙俱係職官應知守法乃欲爲裘曰修開脫展轉通信屬託均請交部議處張紹衡見已供出實情所有職銜無庸議革諭此事面面質對其言出自裘曰修已無疑義若謂裘曰修有意通信何難密札胡中藻令其並行銷毀滅迹而乃假諸張紹衡之口此固不然但從前查辦胡中藻詩集朕原特交蔣溥密辦事閱數年裘曰修同事內廷偶爾閒談亦情理所有而張紹衡向胡中藻說原在未經發覺之前俱出無心於胡中藻本案初無關涉自可無庸辦理乃裘曰修面承詢問

堅執以爲並無此言是以將張紹衡提拏質對俾此事水落石出而裘曰修以業經諱飾於前因卽遂非於後今據供證確鑿則裘曰修面欺之罪實無可追裘曰修著交部嚴察議奏張紹渠身爲監司方將操三尺以按事乃於途次邀見伊弟婉轉通言目無法紀然此猶曰兄弟之情直在其中至其遣家人來京告之饒學曙令其轉達裘曰修是乃明知張紹衡到案萬不能隱諱實情爲此展轉商託不過欲裘曰修聞知感激雖得罪因伊弟之供出而亦不至怨彼其行如鬼蜮巧於夤緣情罪較饒學曙尤重張紹渠著交部嚴加議處餘依議江西風俗向來專以瞻顧鄉情聯絡聲氣爲事胡中藻案內干連人等朕已加恩一切從寬免究乃裘曰修等爲一無關緊要之言而亦必影射避重不知儆惕感悔似此怙終不悛自取罪戾使朕雖欲加恩而天理有所不容不亦大可懼

乎將此通行傳諭俾咸知洗心滌慮安分守法以副朕輝惡成俗  
之意尋議裘曰修照溺職例革職係革職留任之員應革任張紹  
渠照夤夜奔競例革職饒學曙照不應重律降三級調用得旨裘  
曰修著革任饒學曙著銷去加一級仍降二級餘依議裘曰修尋補授中允  
○己亥調書山爲刑部侍郎以夢麟爲工部侍郎由內閣學士遷○庚子  
班第奏據阿睦爾撒納密行告稱若以噶勒藏多爾濟爲綽羅斯  
汗眾心不服不若於事定後齊集各宰桑得木齊等廣爲諮訪於  
噶爾丹策零親戚中不論何姓擇眾心誠服能禦哈薩克布魯特  
者公同保奏俾領其眾則輿情旣協亦可永遠甯帖臣告以奉旨  
封四衛拉特各爲一汗令自管轄若另選別姓不獨未合 聖意  
卽準噶爾眾心亦豈允服阿睦爾撒納復稱我蒙 皇上重恩已  
極尊榮復有何求但我等四衛拉特與喀爾喀不同若無總統之

人恐人心不一不能外禦諸敵又生變亂俟與額駙公同商酌再  
爲陳請臣卽密行知會額駙色布騰巴勒珠爾豫爲留心再伊此  
時惟以糾合從前失散之人圖立產業爲急務又常言帶領鄂拓  
克投降之宰桑索薩資等原係伊輝特部落之人種種虛張聲勢  
其希冀僥倖之心已經畢露俟大功告成臣與薩喇爾鄂容安等  
悉心辦理不使稍萌妄念再內大臣瑪木特退後每摘發阿睦爾  
撒納之短而覲面又多迎合似屬年老昏憤不可深恃諭軍機大  
臣等班第奏阿睦爾撒納言語情形一摺阿睦爾撒納不無希冀  
僥倖之心班第答以準噶爾地方四衛拉特封爲四汗之處業已  
降旨斷不可改持論甚爲得體若止封阿睦爾撒納爲汗則辦理  
準噶爾一事全爲伊一人集事矣然伊卽潛萌覬覦之念班第惟  
以奉有諭旨不敢妄行陳奏正詞相拒料伊亦不敢遽爾妄行但

此念既萌久留彼處於事無益若卽促其來京使之疑懼亦有未便俟達瓦齊就擒之時將伊同眾台吉遣回固可安然無事但從前原有留伊駐紮辦事之旨班第若恐急遽遣回致伊頓起猜嫌不若仍遵前旨行班第惟酌量情形善爲籌畫不必拘泥朕旨至瑪木特原係一狡猾之人其行爲更可不必深論從前薩喇爾亦曾將眾人不願封噶勒藏多爾濟爲汗之處奏聞朕曾傳諭王保令其暫停降旨今阿睦爾撒納又爲此言看來眾心果有不願亦未可定班第留心訪問並察看噶勒藏多爾濟如果不足服眾卽由噶爾丹策零近族內揀選一人封爲綽羅斯汗之處作爲己意密與阿睦爾撒納商議具奏若其人尙屬可用卽不必商辦總俟伊入覲後再行定奪將此密諭班第知之○辛丑薩喇爾等奏臣等分兵兩路渡伊犁河於五月初三日抵河岸適副都統額爾登



額帶領索倫兵一千亦至軍威丕振近河居住之宰桑得木齊等  
來降者甚眾臣等復遣人前往招服伊犁河原居住之朱爾都斯  
空格斯哈什等處烏魯特克勒特一萬餘戶亦漸次來歸報聞○  
湖廣總督開泰奏查荊州素出綾絹絲布其所需之絲皆取給本  
省是楚中風土非不宜蠶止緣工匠習業平常若令江浙工匠教  
以染造自能馴致改觀並可做織紬紗臣與撫臣並在省司道公  
同捐辦已向江南雇募工匠來楚復選覓荊州工匠到省設立機  
局使之試織其倣織之宮紬府紗頗肖江南商店聞而購買得價  
尙易察其情形似堪收效惟是捐辦不能經久又未便請動正項  
查有惠濟加鑄節省工料錢二千餘串可以暫借俟民間學織者  
眾即將官局停止料物變繳完款報聞

六月癸卯朔命四衛喇特照喀爾喀例每部落設盟長及副將軍

一人○丙午阿睦爾撒納等奏臣等於五月初五日渡伊犁河隨領兵趨行與西路大兵連絡聲勢初十日至華諾輝圖西里見有賊人蹤迹隨赴薩喇爾等營定議兩路並進迨至哈新烏蘇身親察勘則達瓦齊擁眾萬人後負格登山崖前臨泥淖駐營固守正在相度間據哨探人等將自達瓦齊營內脫出來投之莽漢們都二人伴送據稱係明阿特鄂拓克之人在近爲達瓦齊訓取前來今見大兵情願投誠達瓦齊自特穆爾圖淖爾帶兵來此軍械不整馬力亦疲各處可調之兵已收括無遺見在眾心離散願降者多臣等詳察地利於十四日兩軍各據形勝整陣以待並示欲掠遊牧之勢將誘出達瓦齊乘機執縛是夜派翼領喀喇巴圖魯阿玉錫厄魯特章京巴圖濟爾噶爾新降宰桑察哈什等帶兵二十二名往探達瓦齊蹤迹阿玉錫等突入賊營衝擊出其不意賊眾

驚潰自相蹂躪達瓦齊僅率二千餘人竄去黎明時收服四千餘  
眾臣等一面安撫一面令郡王青滾雜卜參贊大臣公達爾黨阿  
等領兵分路追躡臣等亦統兵繼進收取達瓦齊家屬達瓦齊雖  
暫時免脫勢已狼狽可不日就擒諭軍機大臣等阿睦爾撒納等  
帶領官兵至達瓦齊駐營之地指示調度列陣揚威派喀喇巴圖  
魯阿玉錫等帶兵僅止二十二名卽能賈勇無前使賊眾驚潰敗  
走招撫數千餘人深屬可嘉喀喇巴圖魯阿玉錫巴圖濟爾噶爾  
察哈什等遵令乘夜翻營一鼓先登所向披靡尤爲實力奮勉俱  
著加恩授爲散秩大臣仍加賞男爵准其世襲並賜銀三百兩兵  
丁二十二名俱著授爲三等侍衛仍各賜銀一百兩喀喇巴圖魯  
阿玉錫在軍營已及一年見亦無事著卽馳驛赴熱河到時朕仍  
從重加恩遣回游牧居住其投誠之厄魯特莽漢們都原係達瓦

齊調取之兵傾心歸順將賊情先悉稟告亦堪嘉予著阿睦爾撒納等卽酌量賞資以示獎勵○丁未諭軍機大臣等班第等奏達瓦齊遺棄妻子身帶百餘人逃往布魯特地方阿蘭泰等領兵尾追不日自當俘獲達瓦齊篡逆暴亂斷不可任其免脫儻若逃入布魯特境內班第等卽選派幹練人員遣往彼處明白開示務令將達瓦齊擒獻但止爲索取達瓦齊無庸帶兵前往不過遣一妥員經理足矣阿睦爾撒納薩喇爾旣深知彼處情形著與班第悉心斟酌籌辦務期必就擒獲見在準噶爾全部俱已底定惟餘達瓦齊一人未獲所有應行前來入覲人員卽當派定著阿睦爾撒納等將派定人數及何日起程何日可到之處速行奏聞其此次收取達瓦齊家屬奮勉行走官兵著將軍班第等查明奏聞分別議敘賞資○諭侍衛濟福回京奏稱薩喇爾聞知伊子信息惟以

追擒達瓦齊爲事並未遣人往尋等語薩喇爾出力奮勉不以私事廢公實能明曉大義朕心深爲嘉予此時伊子諒已回至遊牧著加恩授爲三等侍衛此朕因薩喇爾實心效力特加優眷將此傳諭薩喇爾知之○戶部等部議奏陝甘總督刑部尙書劉統勳奏川省協計軍需銀查驗委有青潮照色折算共短銀二千一百一十八兩應如該督所奏於前任四川藩司齊格家屬名下追繳並先於督撫藩司名下按股分賠以充軍需之用其前署藩司史奕昂照例隱不報例革職黃廷桂照應奏不奏例降三級調用永常劉統勳照例降二級調用得旨依議史奕昂著革職黃廷桂著降三級劉統勳著銷去加一級仍降一級俱從寬留任永常著銷去軍功加一級免其降調○己酉加上 皇太后徽號曰 崇慶慈宣康惠敦和裕壽純禧皇太后○諭平定準噶爾捷聞以

數十年通寇迅就廓清荒服敕甯中外蒙福迺我國家無疆之庥  
緬維 皇祖聖祖仁皇帝削平三孽於康熙二十三年詎吉東巡  
親祭闕里 武功文德彪炳簡冊朕仰承 先烈集此大勳保  
泰持盈彌深兢業親告成功於 太廟 郊 社 嶽 瀆諸祀  
次第遣官敬謹舉行以昭茂典 先師孔子闕里理應恪循 成  
志躬詣行禮用申誠敬且自瞻謁 林泉已逾六載仰止之念時  
切於懷擬於明歲春日敬奉 皇太后安輿自京啓鑾恭詣曲阜  
率華所經亦以體察吏治清問閭閻行慶施恩以稱朕法 祖尊  
師之至意所有應行豫備事宜該部詳議以聞○諭國家賞功

酬庸予以錄敘所以激勵戎行典至重也準噶爾一事從前我

皇祖 皇考屢申撻伐而彼部落藩籬完固未得機會是以暫議  
撤兵邇來喇嘛達爾扎達瓦齊等互相爭殺內亂頻仍其台吉車

凌車凌烏巴什阿睦爾撒納等款塞內附先後踵至朕爲天下共主兼覆並轉自當爲之經理遊牧以計長久而又適當達瓦齊眾畔親離勢同瓦解此正機有可乘之時因議及兩路進兵而人心狂於久安挾畏難之見者多而具奮迅之衷者百無一二今賴上天默佑克集大勳計軍需所費較之從前纔及十之一二耳以機會所迫一舉可成之功猶多苟安懦怯徘徊觀望儻更有艱鉅過於此者尙安冀其勇往任事乎滿洲舊俗一聞用兵無不人人踊躍以不與爲恥不意承平日久漸成畏葸之習至於如此是以朕於此大功克就遠夷歸化之時不爲之喜而爲之寒心策楞舒赫德之畏葸旣已屢降明旨矣此次進剿命班第爲北路將軍永常爲西路將軍在班第領兵前進亦不過遵朕所授機宜黽勉無誤已邀爵賞然此爵賞非策楞舒赫德之所應得者乎使永常但

效班第豈不同膺寵錫之榮乎乃伊自受事以來強欲自用又不能與前進之列更沾沾以接濟兵糧爲必不可緩之事以見己之長且曰自二月十二日襄兩月之糧今已將盡矣獨不思按月齎糧原止就大槩通融計算若一一計口授食則人之食量不齊有日食一盂者亦有增至數倍者以食多者一月之用即可爲食少者數月之儲乃欲比量而差等之有是理乎且因糧於敵亦從來軍興勝算永常又何獨明於彼而暗於此也今大兵已集功成迅速何嘗有軍糧不足之事設如伊所奏辦理將展轉挽運動逾數旬豈遂能接濟大兵之邁行耶况用兵於萬里之外斷難斤斤以饋迎爲事永常所見仍兵行糧隨漢人論兵故套而實昧於機宜不但此也此次功成寶賴、上天篤佑新附之人深感朕恩是以迅速集事耳若稍有相持情形而永常糧絕之言中於人心其害



尚可問乎在永常罪且難追何得尙與有功者一體錄敘耶至於昔年和通呼爾罕諾腦爾進兵時岱豪等旣不能殲賊立功又不能奮身拒敵束手受困徒以自盡了事夫果有捐軀之志何不死於矢石之間爲此婦人女子之爲乎對敵之際而領兵之人相率自盡豈不先折士氣似此懦怯無能之人損威失重卽自行引決猶當將伊子孫議罰尙何功之可錄乎且並有乘他人之勝將已繫頸之賊比比射死以示威者以今觀之豈不大可笑耶卽阿岱等亦曾失誤軍機僅以身歷行閒倖邀議敘此等世職勸懲攸關朕久欲查辦因西隅之事未完隱忍未經降旨見在大功旣奏荒服敕甯有功諸臣俱已特加懋賞其前次冒濫邀功者亦不可不加釐剔以昭平允所有和通呼爾罕諾腦爾等處用兵所得世職人員著交軍機大臣及該部詳悉查明如有冒濫應行裁革者奏

明請旨用副級實獎勵之道○庚戌諭軍機大臣等準噶爾全部已定班第等仍留彼處辦事俟一二年內將伊等撤回後每年自京遣派大臣一員前往巡查該處情形但如此更換需用多人著班第等於準噶爾舊大宰桑之子孫或已革宰桑內擇其誠實者揀選八九人帶領家屬移居察哈爾地方令其巡查並資差遣副都統達什敦多布及投誠之屋勒古濟爾卽附入察哈爾旗內居住必須妥爲安置此揀選人內如未有職銜者著加恩賞給散秩大臣○調李侍堯爲戶部侍郎以王際華爲工部侍郎由內閣學士遷○以多綸爲禮部侍郎蔣洲爲山西布政使挖穆齊圖爲山西按察使由福建臺海道遷○癸丑阿克敦以老疾免以鄂彌達爲刑部尙書仍

兼署吏部尙書事阿里衮署工部尙書降永常爲吏部侍郎仍帶革職留任召劉統勳來京調黃廷桂爲陝甘總督開泰爲四川總

督碩色署湖廣總督以愛必達爲雲貴總督郭一裕署雲南巡撫

白鍾山署山東巡撫

由河道總督兼署

○賞策楞都統銜駐巴里坤辦理

事務○改廣東廣南韶連道轄之廣州府歸糧道轄○免福建諸

羅縣民遠年墾荒罰項○乙卯諭大學士陳世倌協辦大學士蔣

傅等奏稱江浙士庶望幸情殷請於明歲再舉南巡一摺朕自乾

隆十六年巡幸吳越迄今已閱五載該督尹繼善喀爾吉善等均

曾具摺奏請朕因西師尚未凱旋未經允准見今膚功迅奏荒服

敕甯南省民風吏治時塵於懷而高堰隄工尤數郡生靈攸繫上

年告竣以後正當親加察勘前降旨於明歲春月展謁孔林著

允大學士等所請於禮成之後敬奉聖母皇太后鑾輿順道前

往江浙以抒勤民之隱而慰望幸之忱朕省風觀民入境考績惟

期勤求實政宣達羣情一切供頓俱出內府絲毫不以擾民地方

官毋得指名儲備令眾商捐輸及扣各屬養廉查出定行嚴加究處前者巡幸南省時屢飭各督撫務從簡樸而所至尙覺過於華飾喧囂耳目此次行宮及名勝憩息之地悉仍舊觀但取灑掃潔除槩無得增一椽一瓦毋陳設玩器城市經塗毋張鉦演劇踵事增華巡覽所及各督撫等果能綏輯井疆康乂蒸庶俾人敦禮讓俗慶盈甯朕自深爲嘉悅若其從事華麗致飾觀美耗有用之財侈無益之費適以自滋咎戾甚無取焉各督撫及所屬官民人等尙其善體朕心以副朕觀風問俗行慶施惠之至意○諭饒學曙因張紹渠差人通信裘曰修一節已經部議降調但饒學曙固屬瞻顧鄉誼徇情多事而較之張紹渠身爲監司與押解在途人犯教供通綏市恩藐法者其情事尙爲有間是張紹渠之罪萬無可追饒學曙猶有可原今裘曰修已經加恩錄用饒學曙著從寬照

部議所降之級留編修任朕辦理庶政一秉至公於大小臣工賞  
罰黜陟從無成見並將此通行傳諭知之○命和托輝特郡王青  
滾雜卜等管理新降烏梁海人戶○己未以逆犯羅卜藏丹津巴  
朗孟克特穆爾等解送來京遣官告祭 太廟 社稷行獻俘禮  
○庚申 上御午門樓受俘巴朗孟克特穆爾正法羅卜藏丹津  
交軍機大臣等審訊○辛酉諭向來武職封階自二品至五品俱  
得授爲將軍此沿襲漢唐以來散官名號之謬也國家制度名實  
必須相符今受鉞專征膺閫外之寄者始稱將軍而各省駐防則  
一品大臣也乃以加之都守等弁名不正則言不順此甚無謂考  
宋制武職原有武功大夫武功郎等階今一品武臣旣封大夫其  
二品至四品宜亦改稱大夫五品以下則俱改稱爲郎但各冠以  
武字可耳著軍機大臣等擬定字樣候朕酌定載入會典以昭典

制其從前已領誥敕亦不必追改○諭軍機大臣等班第等拏獲達瓦齊宰桑策凌多爾濟等訊問口供知達瓦齊見逃往布魯特境內我大兵深入平定伊犁阿睦爾撒納薩喇爾等若果輕騎掩襲達瓦齊卽可擒獲乃將軍等因伊犁既定稍覺大意以致達瓦齊脫逃伊等原奏內稱達瓦齊帶領百餘人逃遁今又稱帶領千餘人其脫逃日期前後亦不相符此時務須併力擒獲見在班珠爾阿蘭泰等領兵追擒尙未回營若果已爲班珠爾等擒獲甚善儼尙未擒獲達瓦齊必已入布魯特班第等諒已遵朕旨遣人曉諭索取布魯特遵諭擒獻則已如不卽日擒獻大兵見集伊犁卽著副將軍薩喇爾帶領精兵數千名至布魯特邊界駐紮以振聲威揀選強幹人員遣往布魯特剴切曉諭如敢稍爲觀望卽進兵擊取務期擒獲達瓦齊此事關繫甚要斷不可再失機會薩喇爾

宜加意奮勉不得稍有怠忽班第阿睦爾撒納暫駐伊犁辦理事務仍將薩喇爾進兵情形隨時速奏○諭據班第密奏阿睦爾撒納不欲遣青滾雜卜招降汗哈屯居住之烏梁海等惟派令新投宰桑圖布慎等曉諭招降班第未經允從仍遵前旨辦理等語甚屬持正得體從前曾疑阿睦爾撒納有希冀僥倖之心今觀此事阿睦爾撒納雖萌妄念班第能果斷定奪阿睦爾撒納亦不敢有異詞似此遵行當亦無可疑慮嗣後班第惟凡事據理直行逆折其計阿睦爾撒納雖有私心班第若將正言開示料伊亦不敢故違伊係狡黠之人若過於防維日久必露形迹轉覺於事無益著密諭班第知之○諭準噶爾全部底定理應加恩撫綏除各台吉屬下應徵貢賦皆台吉等自行辦理毋庸另議其無台吉之宰桑等所轄人眾貢賦前此諒必俱向達瓦齊交納如舊日所存尙多

足敷養贍喇嘛之用著將伊等今年貢賦槩行寬免若不敷用止將養贍喇嘛之數徵收其餘卽行寬免將此通行曉諭準噶爾人等仍交班第等將準噶爾人等每年應交貢賦數目多寡自明年爲始令如何交納之處查議具奏○壬戌諭軍機大臣等羅卜藏丹津背恩叛逃理應從重治罪但伊入準噶爾年久又率伊二子迎接大兵隨同前進朕特施恩將羅卜藏丹津父子免其死罪羅卜藏丹津著留京賞給房屋一所居住不許擅出伊二子著入正黃旗蒙古旗分授爲藍翎侍衛在司轡上行走並著班第等查明羅卜藏丹津家屬及所屬二十戶不必遷移仍令在原處居住羅卜藏丹津二子於此處另行賞給妻室○諭達瓦齊見在脫逃未獲如布魯特不行擒送薩喇爾仍須帶兵前進所有副將軍卽不必繳回仍留與伊帶用並派哈達哈額爾登額爲參贊大臣○甲



子班第等密奏阿睦爾撒納初尙知感恩勉力從事速冀成功自入塔本集賽遊牧以來所至迎降伊漸志足意滿惟知尋獲被搶人口攫取牲畜又妄自誇張謂來歸之眾俱係向伊投誠及入伊犁益無忌憚縱屬下人肆行劫奪不行禁止及得達瓦齊遊牧所收牲畜財物多方隱匿駝馬各千餘羊至二萬餘又素性貪忍凡有仇隙者任意殺害眾心怨恨遂思擁眾自衛不願撤兵臣等時爲催促推諉觀望且云巴里坤額爾齊斯二處仍須各留精兵五千駐防明係仗我師力威服準夷以遂私計至奏曉諭哈薩克敕書時阿睦爾撒納故意猶豫欲先自行遣使臣等力指其非始令侍衛順德訥同往再取達瓦齊遊牧處一切牲畜財物伊百計阻撓至今尙未得清查至查辦牧場及遣人收服四路之事亦尙未辦一意遷延惟與各宰桑頭目私相往來行蹤詭祕卽如入覲人

數並不卽爲派定催促再四始行開送又屢行更換凡有傳行事件並不用印信仍倣達瓦齊私用小紅鈴記臣等節次理論終不遵行動卽揚言此處人眾欲叛視薩喇爾如讐潛行猜忌阿睦爾撒納圖據伊犁戀戀不已仰懇特降諭旨令其速行入覲早定四部封汗之事以杜非分之想至納噶察居心詭詐惟知附和並請調往青海駐防以散其黨再阿睦爾撒納揚言此處喇嘛等謀叛請將濟隆胡圖克圖速行遣往令其宣諭眾庶安輯人心阿睦爾撒納久居此處致伊等猜疑必至生變或因欲實其言潛行鬼蜮故生事端俱不可不先事豫防諭軍機大臣等班第鄂容安將阿睦爾撒納妄行覬覦阻撓事務及貪取牲畜各情形密行陳奏班第鄂容安留心察看阿睦爾撒納居心行事據實奏聞甚屬可嘉但初覽伊奏似事端已成再四詳閱仍係阿睦爾撒納希圖僥倖

貪得性隻什物耳並無圖占準噶爾實據阿睦爾撒納自投誠以  
來豈受朕恩事事出於望外至朕辦理庶政一惟秉公執法之處  
伊未經身試是以志氣驕盈希圖僥倖亦事所必有班第等卽據  
實陳奏深得防微杜漸之意今朕於阿睦爾撒納奏摺內溫旨批  
諭令伊卽行入覲班第等亦婉言曉諭使其起程前來毋致驚疑  
此時班第鄂容安再細心察看如阿睦爾撒納占據僭越之形果  
有實據卽行密奏朕另行定奪如並未至於此極不過希圖肥己  
亦不必過於苛求儻伊稍有知覺轉於事無益著班第鄂容安密  
與薩喇爾詳細商議公同體察奏聞若無確據而過甚其詞亦不  
能逃朕洞鑒班第等務宜詳密毋得稍有洩漏又諭阿睦爾撒納  
此次辦理諸事動合機宜朕甚嘉悅且甚軫念想阿睦爾撒納亦  
必急思入覲瞻仰朕躬昨雖已降諭旨達瓦齊或往投布魯特著

薩喇爾帶兵往擒班第阿睦爾撒納駐紮伊犁此特欲其協理伊犁事務今思伊犁亦無重大事務即使薩喇爾帶兵前往布魯特班第鄂容安見在伊犁足資辦理著阿睦爾撒納遵朕從前所降之旨卽行馳赴熱河朕俟阿睦爾撒納到後施恩將四衛拉特分封四汗賞功策勳用獎勞績著卽傳諭班第阿睦爾撒納知之○丁卯諭軍機大臣等從前因策楞舒赫德辦理錯誤特將伊等革職令在軍前效力今大功已成朕原欲一體施恩與以奮勉之路策楞人本糊塗諸事皆聽舒赫德指使已賞給都統職銜領兵駐紮巴里坤以觀後效至舒赫德遇事毫無定見且未免退有後言今查其筆札雖無怨望之詞然以滿洲世僕漸染漢人習氣每日記事作詩卽不必治罪亦不宜加恩此乃伊之自誤著仍留烏里雅蘇台以章京效力行走嗣後務宜痛自改悔若仍蹈前轍朕必

重治其罪○戊辰班第等奏達瓦齊敗走時臣阿睦爾撒納卽令屬人朗蘇巴朗同回人阿卜都哈里克等向阿克蘇圖爾珮回人等曉諭黨達瓦齊逃避前去務卽擒送今於六月十三日朗蘇等回營告稱達瓦齊並其子羅卜扎宰桑愛爾齊等七十人已被回人霍集斯伯克設計全行擒獲見帶兵二百起解來營卽遣兵一隊前往木素爾口接應等語臣等卽派索倫兵三百喀爾喀厄魯特兵二百令副都統額爾登額喀爾喀公策登薩木丕勒等帶領接應令將達瓦齊嚴行解送並遣人告知回人霍集斯伯克令其一同監送下部知之○庚午諭軍機大臣等班第薩喇爾鄂容安等密奏阿睦爾撒納意欲占據準噶爾種種僭越妄行情迹顯著一摺前班第等初奏時卽傳諭伊等細心公同體察如阿睦爾撒納果有實據明晰具奏今據班第等奏稱阿睦爾撒納指稱防守

哈薩克市魯特用鈴記行文調兵九千又送銀與喇嘛熬茶並云  
將來統據準噶爾之後當卽善爲照看又擅殺達瓦齊眾宰桑抄  
沒家產私用噶爾丹策零小紅鈴記結交奸佞之徒各處遣人潛  
行招服又告諭屬下有哈薩克懼伊伊在此斷不敢前來等語種  
種不法之處固據準噶爾已無疑義豈必待其生變始爲實據耶  
由阿睦爾撒納福薄不能承受厚恩耳由此觀之伊未必卽遵諭  
旨前來瞻仰卽使前來若令仍往準噶爾伊斷不能安靜守分必  
致妄行滋事與其俟伊結交煽惑變逆而費大何如及今乘機辦  
理之爲得也看來此事斷乎不可不辦朕意已定將此密諭班第  
等阿睦爾撒納若仍未起程班第等卽行密商如何擒拏辦理相  
機完結伊信用之宰桑等亦卽拿解前來其餘無干人等慰諭釋  
放候旨遵行事關緊要伊等務必熟籌妥辦俾一舉卽能甯謐完

結之後班第等可傳諭準噶爾部眾阿睦爾撒納自歸附以來受朕厚恩委任信用伊並不遵奉訓諭敢悖旨擾累投誠人等劫掠牲畜誣讎沙克都爾曼濟叛逆擅殺宰桑等大員抄沒家產其意蓋將準噶爾人等盡行騷動然後獨踞準噶爾令爾等眾台吉宰桑無不爲伊屬下也前因達瓦齊苦累爾等部眾朕始定計發兵安輯地方撫綏眾庶今若恣阿睦爾撒納所爲是貽害爾等必更甚於達瓦齊是以將阿睦爾撒納正法但將伊附和數人治罪至爾等與伊所屬之人俱無干與仍令照舊安生此正爲爾眾人永久安全之計將此通行曉諭如阿睦爾撒納起身前來則俟伊到時朕當另行辦理如伊本不願來又勉強前進及至中途或於路通哈薩克處所逗遛不前或寄信與巴特瑪策凌等勾結生事則應如何先行防範之處著班第等公同熟籌一面辦理一面奏聞

至阿睦爾撒納若經伊游牧處所留戀居住託病不行朕另遣人辦理但辦理阿睦爾撒納後伊游牧處聞之未免驚擾或往哈薩克逃竄此亦當豫行防範朕已降旨以照管烏里雅蘇台市集爲名留兵一千令普慶達色帶領駐防前穆爾渾員缺已降旨令阿蘭泰在烏里雅蘇台駐紮辦理阿睦爾撒納游牧卽著阿蘭泰普慶達色領兵前往與納穆扎爾辦理班第等將辦理之處一經酌定卽速行知阿蘭泰令同普慶達色領兵往游牧處將伊妻子及扎木燦並素日任用之霍同一併拏解來京餘眾俱屬無與亦將此徧行明悉宣諭以安眾心但馬駝之場不可留與伊等見在所  
有馬駝應卽盡行收取使伊等不得乘騎逃遁如阿蘭泰在彼處  
尙未起程將此詳細告知儻已起程則辦理阿睦爾撒納後卽用  
密信速寄如阿睦爾撒納至熱河此處辦理臨期朕降旨與阿蘭



泰等將伊遊牧辦理班第等辦理此等機要之事不得先事少有洩漏使之驚覺一切當體會朕意計出萬全再此事辦理時雖不能不任智術然仍當示之以大國之威信使舉動得體方爲妥協朕於此事慮念甚切此旨一到班第等卽將如何籌辦之處密速奏聞○以莊存與富貴俱爲內閣學士

莊存與由少詹事富貴由翰林院侍講學士遷